

Anugerah iktiraf projek buku negeri

Selangor pergat usaha terjemah karya agung berikutan kejayaan penghasilan lebih 70 judul daripada pelbagai latar belakang dan bahasa antaranya menerusi Inisiatif Buku Darul Ehsan selain meneruskan program diskusi serta pesta buku

MUKA 2

Terima kebenaran bangun kompleks sukan

Majlis Bandaraya Shah Alam beri kebenaran kerja perobohan Stadium Shah Alam bagi pembangunan semula kompleks sukan atas tanah seluas lebih 80 hektar pada 22 Disember

MUKA 3



Perdana Menteri Datuk Seri Anwar Ibrahim menyampaikan Anugerah Perdana Tokoh Kepimpinan Muda Cemerlang Dalam Memartabatkan Pembangunan Buku Negara kepada Dato' Menteri Besar Dato' Seri Amirudin Shari dalam Majlis Anugerah Buku Negara di Universiti Pendidikan Sultan Idris, Muallim pada 21 Disember 2023. Foto AHMAD ZAKKI JILAN ►BERITA MUKA 2

pancawarna

Setahun pencapaian cemerlang Selangor

Selain ekonomi rancak dan politik stabil, Kerajaan semarak festival kitab tersohor



9

Warna-warni politik sepanjang 2023

Tindakan kepada kartel ayam, sita Menara Ilham antara peristiwa di luar jangkaan



11

Atlet kebangsaan hebat gegar pentas dunia

Prestasi cemerlang atlet negara dalam beberapa kejohanan bakar semangat peminat sukan



15

MB terima Anugerah Buku Negara

MUALLIM - Dato' Menteri Besar menerima Anugerah Perdana Tokoh Kepimpinan Muda Cemerlang Dalam Memartabatkan Pembangunan Buku Negara menerusi Anugerah Buku Negara 2023.

Bertempat di Dewan Tuanku Canselor Universiti Pendidikan Sultan Idris (UPSI), Dato' Seri Amirudin Shari mengetuai senarai penerima anugerah yang disampaikan Perdana Menteri Datuk Seri Anwar Ibrahim pada 21 Disember.

Pada majlis sama, Ketua Setiausaha Negara Tan Sri Mohd Zuki Ali turut menerima Anugerah Perdana Tokoh Kepimpinan Prolifik Dalam Memartabatkan Buku Negara menerusi buku berjudul G.R.E.A.T!

Anwar turut menyampaikan trofi kepada Majlis Profesor Negara yang menerima Anugerah Khas Perdana Rakan Strategik Terbaik Dalam Memartabatkan Industri Buku Negara manakala Majlis Buku Kebangsaan Malaysia pula menerima Anugerah Khas Penggerak Industri Buku Negara.

Persiapan rapi urus bencana

SHAH ALAM - Agensi Pengurusan Bencana Negara (Nadma) mengarahkan Jawatankuasa Pengurusan Bencana Peringkat Negeri/Daerah (JPBN/JPBD) diaktifkan berikutan amaran hujan berterusan tahap waspada di beberapa kawasan yang dikeluarkan oleh Jabatan Meteorologi.

Nadma dalam Notis Kesiapsiagaan Operasi Bencana meminta JPBN dan JPBD meningkatkan tahap kesiapsiagaan termasuk pusat pemindahan, keperluan asas dan pos kawalan bagi menghadapi bencana terutama di kawasan berisiko tinggi.

"Pusat kawalan bencana juga sentiasa dalam kesiapsiagaan menerima maklumat bencana, bantuan pengurusan dan pengoperasian dari semasa ke semasa melalui nombor telefon 03-8064 2400, faksimili 03-8064 2429 dan alamat e-mel opsroom@nadma.gov.my," menurut kenyataan pada 20 Disember.

IMBAS DI SINI
akbar digital minggu lepas

Sokong sekat kapal Israel berlabuh

MUALLIM - Selangor menyokong keputusan kerajaan menyekat dan tidak membenarkan syarikat perkapalan berpangkalan di Israel, ZIM daripada berlabuh di mana-mana pelabuhan Malaysia.

Dato' Menteri Besar Dato' Seri Amirudin Shari berkata keputusan itu membuktikan Kerajaan Perpaduan konsisten memberi sokongan dan solidariti kepada Palestin.

"Keputusan ini adalah satu kon-

sistensi perdana menteri dan pentadbiran Malaysia yang wajar diberi perhatian. Kita bertindak selepas melihat keadaan tidak berubah di Timur Tengah, di Gaza.

"Saya percaya langkah ini usaha berani dan wajar mendapat sokongan sebab konsistensi serta keputusan sikap dalam memberi sokongan pada sahabat di Palestin," katanya pada 21 Disember.

Pada 20 Disember, Anwar meneru-

si kenyataan memaklumkan kerajaan memutuskan sekatan berkenaan dan Kementerian Pengangkutan akan segera mengenakan larangan kekal terhadap syarikat itu.

Katanya, sekatan itu tindak balas terhadap Israel yang mengenepikan prinsip asas kemanusiaan dan melanggar undang-undang antarabangsa menerusi pembantaian serta kekejaman berterusan terhadap Palestin.

Giat cari karya terbaik

Iktiraf usaha perjemahan

Oleh **SITI ROHAIZAH ZAINAL**

MUALLIM - Dato' Menteri Besar menyatakan anugerah utama diterimanya dalam Anugerah Buku Negara 2023 sebagai pengiktirafan kepada Selangor yang giat menterjemah karya agung.

Dato' Seri Amirudin Shari menjelaskan lebih 70 judul daripada pelbagai latar belakang dan bahasa diterjemah antaranya menerusi Inisiatif Buku Darul Ehsan (IBDE) yang ditubuhkan sejak 2016.

"Ini bukan kemenangan peribadi tetapi pengiktirafan buat Selangor

yang mempunyai projek pencerahan rakyat menerusi terjemahan karya agung, diskusi termasuk penganjuran pesta buku yang memberi impak baik kepada pembaca dan penerbit.

"Malah, penggal ini kita mula berbaucar buku di universiti dalam Selangor dan Lembah Klang yang akan dilebar serta diperhebat," katanya pada 21 Disember.

Dalam majlis tersebut, Amirudin menerima Anugerah Perdana Tokoh Kepimpinan Muda Cemerlang Dalam Memartabatkan Pembangunan Buku Negara disampaikan Perdana Menteri Datuk Seri Anwar Ibrahim.

Sementara itu, beliau memaklumkan anugerah berkenaan akan terus menjadi pemangkin untuk Selangor menghasilkan lebih banyak karya berkualiti daripada penulis berpengalaman.

"Dengan anugerah ini, sudah pasti kita akan mencari buku-buku dari penulis berkualiti, pelajar baik sebagaimana dianjur Hadiah Sastera Selangor.

"Usaha ini wajar diteruskan sebagai sebuah kerajaan serta pentadbiran demi memastikan rakyat tercerah selain mempunyai pemikiran rasional," ujarnya.

Tumpu peluang kerja bergaji tinggi

SUBANG JAYA - Selangor mahu menarik lebih ramai pelabur berkualiti tinggi dalam pelbagai sektor mulai tahun depan bagi mewujudkan peluang kerja bergaji tinggi kepada anak muda.

EXCO Pelaburan Ng Sze Han percaya negeri meletakkan hala tuju demikian supaya usaha memulihkan ekonomi negeri berjalan lancar dan lebih cepat.



"Dengan cara ini, kita yakin peluang mewujudkan pekerjaan bergaji tinggi pasti lebih cerah," katanya.

Beliau menambah penganjuran program bertaraf antarabangsa seperti Sidang Kemuncak Perniagaan Antarabangsa Selangor (SIBS) dan Pameran Udara Selangor (SAS) juga akan diteruskan.

"Dengan adanya ekspo ini, kita

dapat mempromosi nama Selangor sebagai destinasi pelaburan terbaik di rantau Asean," katanya.

Pada tahun depan, SIBS dijadual berlangsung dua kali iaitu antara 25 hingga 27 Julai dan 16 hingga 19 Oktober di Pusat Konvensyen Kuala Lumpur.

China, Indonesia, Japan, Vietnam, Kazakhstan, Korea, Turkiye dan Australia antara negara luar yang mengambil bahagian dalam penganjuran edisi ketujuh.

Tarik pelaburan RM88.88 bilion

SHAH ALAM - Kerajaan Negeri berjaya menarik pelaburan asing dan tempatan berjumlah RM88.88 bilion meliputi 1,507 projek perkilangan antara 2018 hingga Jun tahun ini.

Dato' Menteri Besar Dato' Seri Amirudin Shari menjelaskan hasil pelaburan tinggi itu juga mewujudkan 95,610 potensi peluang pekerjaan untuk dinikmati rakyat negeri ini.

Menurutnya, industri tumpuan termasuk sains hayat, pembuatan makanan dan minuman, produk elektrik dan elektronik selain kelengkapan dan pengangkutan seperti aeroangkasa dan dron.

"Promosi pelaburan secara fizikal atau dalam talian dengan pihak dewan perniagaan tempatan dan luar negara juga rancak selain mengenal pasti sek-

tor perkhidmatan berpotensi.

"(Ia merangkumi) perkhidmatan logistik, pelaburan digital seperti perniagaan perkhidmatan global, pusat data dan teknologi kreatif," katanya dalam kenyataan di Facebook pada 28 November.

Untuk rekod, sebanyak RM53 bilion melibatkan pelaburan modal asing manakala baki dari tempatan.



JOHAN... Duli Yang Maha Mulia Tengku Permaisuri Selangor Tengku Permaisuri Hajah Norashikin (tengah) bersama pelajar Universiti Kebangsaan Malaysia yang menjuarai pertandingan Debat Diraja antara IPT 2023 di Shah Alam pada 18 Disember. Turut hadir Dato' Menteri Besar Dato' Seri Amirudin Shari dan Menteri Pendidikan Tinggi Datuk Seri Dr Zamby Abd Kadir (kanan). Foto Facebook Selangor Royal Office

Pembangunan kompleks sukan

Terima kebenaran merancang

Oleh SUHAILA SHAHRUL ANNAR

SHAH ALAM - Majlis Bandaraya Shah Alam (MBSA) sudah mengeluarkan kebenaran bagi kerja perobohan Stadium Shah Alam bagi pembangunan semula Kompleks Sukan Shah Alam (KSSA) yang baharu, kata Dato' Menteri Besar.

Dato' Seri Amirudin Shari di laman X memaklumkan kebenaran itu dikeluaran pada 22 Disember.

"Baru dapat kebenaran MBSA semalam (22 Disember)," katanya menjawab soalan berkaitan perkembangan projek pembangunan semula

KSSA pada 23 Disember.

Kerajaan Negeri bakal membina kompleks sukan baharu bagi mengantik kemudahan sedia ada di Seksyen 13, Shah Alam yang rosak akibat banjir mulai 2006.

Bencana itu, termasuk pada 2013 dan 2021, mengakibatkan kerosakan padang, sistem pendawaian, bilik bekalan elektrik, bilik persalinan dan aras bawah stadium selain menjaskan aspek keselamatan.

Pada 21 November ketika sesi penggulungan Belanjawan Selangor 2024 dalam sidang Dewan Negeri Selangor, Amirudin memaklumkan pelan kebe-

naran merancang bagi projek pembangunan KSSA telah dihantar pada 15 November dan proses perobohan stadium dijangka dilaksanakan bulan ini dengan anggaran kos RM30 juta hingga RM50 juta.

Projek KSSA di atas tanah seluas lebih 80 hektar meliputi pembinaan hotel, stesen perkhidmatan awam bersepadu, pusat teater dan kawasan komersial.

Ia juga bakal menampilkan stadium bercantum bertaraf antarabangsa dengan kapasiti 35,000 hingga 45,000 penonton selain menyedia tanah seluas 10 ekar bagi pembinaan projek tebakan banjir dan kolam tadahan.

Pantau keadaan semasa Covid-19

MUALLIM - Kerajaan Negeri memberi jaminan untuk menangani peningkatan kes Covid-19 sebaiknya, berbekalkan pengalaman lalu ketika berdepan pandemik itu pada 2020.

Dato' Menteri Besar Dato' Seri Amirudin Shari menjelaskan pihaknya memantau secara terperinci perkembangan kes dan akan bertemu EXCO berkaitan bagi melihat keadaan semasa.

"Setakat ini, hospital masih boleh

tampung (kes) dan tidak perlu laksana langkah (drastik). Saya akan terus dapatkan laporan terkini supaya ia tidak sampai ke tahap membebankan seperti 2020 dan 2021," katanya pada 21 Disember.

Sebelum ini, EXCO Kesihatan Awam Jamaliah Jamaluddin menjangka kes Covid-19 di negeri ini terus melonjak berikutnya sambutan perayaan Krismas, di samping musim cuti sekolah.

Berikutan itu, beliau menyeru rakyat supaya mematuhi panduan kesihatan dan mengamalkan langkah pencegahan antaranya mengenakan pelitup muka di kawasan sesak atau tertutup.

Orang ramai juga dinasihatkan supaya tidak pergi ke tempat sesak atau kawasan tumpuan jika mengalami sebarang gejala dan segera berjumpa doktor sekiranya tahap kesihatan bertambah serius.

Lantik ahli lembaga tabung biasiswa

SHAH ALAM - Ahli Dewan Negeri (ADN) Kampung Tunku Lim Yi Wei antara tiga individu yang dilantik sebagai Ahli Lembaga Tabung Kumpulan Wang Biasiswa Negeri Selangor (TKBNS) pada 20 Disember.

Majlis penyampaian surat pelantikan tersebut disempurnakan oleh Dato' Menteri Besar Dato' Seri Amirudin Shari di bangunan pentadbiran negeri.

Pejabat Setiausaha Kerajaan Negeri Selangor memaklumkan dua lagi yang dilantik ialah ADN Batu Tiga Danial Al-Rashid Haron Aminar Rashid dan Pegawai Tugas-Tugas Khas kepada Dato' Menteri Besar Selangor Mohd Nazri Noh.

"Tahniah dan selamat bertugas diucapkan," menurut pejabat itu menerusi Facebook.

Beri pemilik masa pulih tapak

SHAH ALAM - Kerajaan Negeri tidak boleh terus merampas tanah yang diajukan tapak pelupusan sampah haram di Batu 14, Kapar, Klang.

Sebaliknya, Dato' Menteri Besar menjelaskan tempoh tertentu perlu diberi kepada pemilik untuk memulihkan tanah sebelum tindakan lanjut diambil.

"Mengikut undang-undang dan pengalaman, kita kena bagi masa kepada pemilik tanah untuk memulihkan tanah. Kita (Kerajaan Negeri) pernah kalah dalam kes mahkamah kerana merampas tanah dalam tempoh singkat.

"Gesaan kepada pemilik tanah perlu dilakukan (untuk memulihkan tanah) dan kita kena bagi masa. Jika tidak dibuat (puhil tanah), kita rampas (tanah)," kata Dato' Seri Amirudin Shari baru-baru ini.

Mohon tingkatan satu mulai 3 Januari

SHAH ALAM - Permohonan program Rancangan Khas Pendidikan Yayasan Selangor (RKPYS) Kementerian Pendidikan Malaysia (KPM) untuk pelajar tingkatan satu dibuka pada 3 Januari.

Yayasan Selangor memaklumkan permohonan khusus kepada pelajar daripada keluarga berpendapatan rendah dibuka sehingga 15 Januari dan tarikh akhir penghantaran dokumen pada 26 Januari.

"Antara kriteria kelayakan permohonan mendapat sekurang-kurangnya TP3 untuk semua mata pelajaran Pentaksiran Bilik Darjah Tahun 6 sekolah rendah.

"Pelajar juga bersekolah di sekolah rendah atau swasta yang berdaftar di KPM dengan keutamaan diberikan kepada pelajar luar bandar," katanya.

Pemohon atau ibu atau bapa mestilah lahir di Selangor atau bermastautin sekurang-kurangnya 10 tahun serta pendapatan ibu bapa kurang RM2,000 sebulan.

Maklumat lanjut layari pautan yayasanselangor.org.my

Sasar bekalan air bersih 2025

SHAH ALAM - Fasa pertama Visi Tenaga Net Zero 2040 yang diperkenal Pengurusan Air Selangor Sdn Bhd (Air Selangor) dijangka lengkap menjelang 2025.

Pemangku Ketua Pegawai Eksekutifnya Ir Abas Abdullah berkata usaha menghasilkan tenaga boleh diperbaharu itu menyedia bekalan air terawat lebih bersih dan selamat kepada 9.1 juta pengguna.

Beliau menambah fasa pertama dijangka lengkap sepenuhnya pada tahap tujuh peratus pada 2025 diikuti 52 peratus (fasa kedua) pada 2030 dan sepenuhnya (fasa ketiga) pada 2040.

Katanya, inisiatif itu mengurangkan kos operasi Air Selangor sekali gus pengguna menikmati bekalan air terawat bersih dan selamat yang dihasilkan menggunakan tenaga boleh diperbaharui.

Beliau berkata demikian dalam wawancara bersama Andrew Wilson di COP28 yang disiarkan di Facebook pada 14 Disember.

Sementara itu, Abas memaklumkan Air Selangor terus melaksana tanggungjawab sosial korporat kepada golongan yang memerlukan menerusi program Sesama Mara.

Selalu waspadai ancaman Covid-19

SHAH ALAM - Penduduk Selangor dinasihat mengamalkan langkah pencegahan dan kawalan diri bagi mengurangkan risiko jangkitan Covid-19 susulan peningkatan kes ketika ini.

Ahli Penasihat Kesihatan Awam Negeri Dr Mohammad Farhan Rusli berkata kawalan seperti pemakaian pelitup muka di tempat awam terutama kawasan tertutup, sempit dan sesak sangat wajar.

"Kawalan kendiri ini sepatutnya sebat dan menjadi amalan rakyat kerana sudah tiga tahun kita terdidik dengan amalan pencegahan penularan Covid-19."

"Selangor negeri yang berkepadatan tinggi. Jadi penjarakan sosial kita (biasanya) terhad terutama di tempat awam yang tertutup seperti pusat beli-belah."

"Selain itu, musim cuti sekolah banyak majlis keramaian, perkahwinan, kenduri berkhatan atau bercuti di taman tema air yang melibatkan ramai orang. Jadi kena jaga diri sendiri dan buat kawalan diri untuk elak menjadi statistik Covid-19," katanya pada 19 Disember.

WAKTU SOLAT
28 DISEMBER 2023 -
3 JANUARI 2024
21 JAMADULAKHIR 1445

Hulu Selangor, Gombak, Petaling, Shah Alam, Hulu Langat dan Sepang

	Imsak	Subuh	Syuru'	Zuhur	Asar	Maghrib	Isyak
28 Khamis	5:54	6:04	7:15	1:17	4:40	7:14	8:29
29 Jumaat	5:55	6:05	7:15	1:18	4:40	7:15	8:30
30 Sabtu	5:55	6:05	7:15	1:18	4:41	7:15	8:30
31 Ahad	5:56	6:06	7:16	1:19	4:41	7:16	8:31
1 Isnin	5:56	6:06	7:16	1:19	4:42	7:16	8:31
2 Selasa	5:57	6:07	7:17	1:20	4:42	7:17	8:31
3 Rabu	5:57	6:07	7:17	1:20	4:43	7:17	8:32

Sedia dana pembangunan tertinggi

SHAH ALAM - Kerajaan Selangor menyediakan peruntukan munasabah bagi perbelanjaan pembangunan tahun depan, angka tertinggi berbanding negeri-negeri lain di Semenanjung.

Dato' Menteri Besar Dato' Seri Amirudin Shari menjelaskan jumlah tersebut juga mengatasi peruntukan pada peringkat persekutuan yang kekal antara 20 hingga 25 peratus.

Bercakap pada sesi penggulungan usul belanjawan dalam sidang Dewan

Negeri Selangor bulan lalu, beliau menegaskan negeri mementingkan pentadbiran cekap, amanah dan berintegriti.

"Negeri pesaing dari segi industri seperti Pulau Pinang memperuntuk belanjawan pembangunan sebanyak 25 peratus manakala Terengganu (26 peratus) dan Johor (36 peratus).

"Sarawak beri saingan. Belanja pembangunan 69 peratus kerana ada royalti dan dana pembangunan infra-

struktur sebahagiannya di bahu kerajaan persekutuan," katanya.

Peruntukan keseluruhan Belanjawan 2024 adalah RM2.53 bilion iaitu RM1.33 bilion atau 52.6 peratus untuk perbelanjaan mengurus manakala 1.2 bilion bagi pembangunan atau 47.4 peratus.

Sejumlah RM2.2 bilion hasil boleh dikutip tahun depan berdasarkan rekod pencapaian pada Ogos 2022 dan September 2023.

Pengambilan Januari

TVET khas untuk lepasan tahfiz

Oleh SUHAILA SHAHRUL ANNUAR

SHAH ALAM - Kerajaan Negeri melalui Inisiatif Kemahiran Teknikal dan Iktisias Smart Selangor (IKTISASS) mewarkan tajaan pengajian khas untuk lepasan tahfiz anak Selangor bagi pengambilan Januari depan.

Menerusnya mereka yang layak berpeluang mengikuti kursus Pendidikan dan Latihan Teknikal dan Vokasional (TVET) berdampak tinggi iaitu teknologi penyamanan udara melalui program Smart Tahfiz TVET.

Pejabat Setiausaha Kerajaan Negeri memaklumkan program 15 buah kendalian Pusat Pembangunan

Kemahiran Teknikal Negeri Selangor (STDC) itu terhad kepada 20 individu terawal yang menepati syarat kelayakan termasuk menghafaz minimum tiga juzuk.

"Yuran pendaftaran, pengajian dan penginapan asrama ditaja oleh Kerajaan Selangor," katanya di Facebook pada 23 Disember.

Kelayakan lain termasuk pemohon mestilah lahir dan bermastautin lebih 12 tahun di Selangor serta berumur antara 16 hingga 21 tahun.

"Pemohon juga merupakan pelajar tahfiz yang masih atau pernah menuntut di sekolah atau institusi tahfiz diiktiraf oleh mana-mana jabatan atau agensi Kerajaan Malaysia dan Kerajaan

Selangor.

"Keutamaan penajaan akan diberikan kepada pelajar atau pelatih dari pada kategori keluarga B40 dan M40," katanya.

Pendaftaran boleh dibuat di pautan forms.gle/eZChSRUS5gjpxFjAA dan lengkapkan borang IKTISASS di drive. google.com/file/d/1wbMtcSkcQg4yZ-vDrdnZc2hwWbLsg629h/view selepas mendaftar.

Sebarang pertanyaan boleh hubungi 03-3281 2676/21 atau menerusi aplikasi Whatsapp [www.wasap.my/60193424111/daftarSTDCSMARTTAHFIZ](https://wasap.my/60193424111/daftarSTDCSMARTTAHFIZ) dan [www.wasap.my/601157535792/daftarSTDCSMARTTAHFIZ](https://wasap.my/601157535792/daftarSTDCSMARTTAHFIZ)

Belia laksana dasar, program negeri

SHAH ALAM - Seramai 228 Penggerak Belia Selangor (PeBS) baharu dilantik bagi menjayakan dasar dan program untuk belia tahun hadapan.



EXCO Belia Najwan Halimi berkata mereka berperanan sebagai penghubung bagi membentuk perpaduan dalam kalangan masyarakat sekali gus mencorak masa depan Selangor yang lebih gemilang.

"Ini membuktikan kepercayaan pentadbiran negeri kepada belia untuk bersama-sama menentukan hal tuju negeri ini. Tahun depan kita juga selaraskan program PeBS dengan dasar belia Selangor dan konsep Rakan Muda."

"Kita juga memperbaikkan program-program literasi politik seperti pemahaman demokrasi dan kenegaraan dalam memupuk semangat nasionalisme dan patriotisme."

"Selain itu, kita mahu belia di negeri ini terlibat dengan program ke-masyarakat yang menjurus kepada semangat perpaduan dan muhibah," katanya pada 16 Disember.

PeBS dijenamakan semula pada 2021 daripada Penggerak Belia Tempatan (PeBT) yang diperkenal sejak 2009.

Pimpinan belia setempat itu memainkan peranan kepada agenda pembangunan generasi muda di setiap Dewan Undangan Negeri.

Klang dan Kuala Langat

Imsak	Subuh	Syuru'	Zuhur	Asar	Maghrib	Isyak
5:54	6:04	7:15	1:17	4:40	7:14	8:29
5:55	6:05	7:15	1:18	4:40	7:15	8:30
5:55	6:05	7:15	1:18	4:41	7:15	8:30
5:56	6:06	7:16	1:19	4:41	7:16	8:31
5:56	6:06	7:16	1:19	4:42	7:16	8:31
5:57	6:07	7:17	1:20	4:42	7:17	8:32
5:57	6:07	7:17	1:20	4:43	7:17	8:32
5:57	6:07	7:18	1:21	4:44	7:18	8:33

Sabak Bernam dan Kuala Selangor

Imsak	Subuh	Syuru'	Zuhur	Asar	Maghrib	Isyak
5:57	6:07	7:17	1:20	4:42	7:16	8:30
5:57	6:07	7:17	1:20	4:43	7:16	8:31
5:58	6:08	7:18	1:21	4:43	7:17	8:31
5:58	6:08	7:18	1:21	4:44	7:17	8:32
5:59	6:09	7:19	1:22	4:44	7:18	8:32
5:59	6:09	7:19	1:22	4:45	7:18	8:33
6:00	6:10	7:19	1:22	4:45	7:19	8:33



CERIA... EXCO Kerajaan Tempatan Dato' Ng Suee Lim diiringi Yang Dipertua Majlis Perbandaran Klang Datin Paduka Noraini Roslan bersama pemenang Anugerah Komuniti Mampan 2023 di Hotel Esplanade, Klang pada 20 Disember.

Foto HAFIZ OTHMAN ▶ BERITA MUKA 20

Atasi masalah kanak-kanak bantut

2,800 terima pek makanan berzat

Oleh SUHAILA SHAHRUL ANNUAR

SHAH ALAM - Seramai 2,800 kanak-kanak menerima bantuan pek nutrisi di bawah program Anak Selangor Anak Sihat (ASAS) tahun ini.

EXCO kesihatan awam berkata bekalan makanan berkhasiat itu turut memanfaatkan lebih 9,000 ahli keluarga kanak-kanak terlibat yang terdiri golongan berpendapatan rendah.

Jamaliah Jamaluddin menjelaskan inisiatif yang dilaksana sejak 2021 bertujuan mengatasi isu kanak-kanak bantut, kurang zat dan berat badan berlebihan.

"Tahun ini skop program ASAS diper-

luas menerusi pelaksanaan Jelajah Program Karnival ASAS di sembilan daerah Selangor yang mana selain pemberian bantuan pek nutrisi pelbagai aktiviti lain turut diadakan.

"Antaranya saringan kesihatan kanak-kanak dan khidmat nasihat pemakanan, demonstrasi masakan pemakanan sihat oleh pakar nutrisi, pertandingan bertema gaya hidup sihat dan pameran kesihatan."

"Objektif jelajah karnival bagi meningkatkan tahap advokasi dan kesedaran ibu bapa dan kanak-kanak dalam aspek pemakanan sihat serta seimbang," katanya dalam kenyataan pada 23 Disember.

Mengulas lanjut, Jamaliah berkata program ASAS dengan kerjasama Universiti Islam Antarabangsa Malaysia sebagai agensi pelaksana akan diteruskan pada masa akan datang.

"Program yang turut mendapat kerjasama daripada pihak pejabat pendidikan daerah, Ahli Dewan Negeri serta pemimpin tempatan ini akan diteruskan pada masa akan datang."

"Kerajaan Negeri berharap masyarakat setempat khususnya ibu bapa memberi kerjasama dengan penglibatan aktif berhubung isu nutrisi kanak-kanak kerana mereka ini adalah pelapis kemajuan dan kemakmuran negeri serta negara," katanya.

Longkang retak punca tanah runtuh

SUBANG JAYA - Laporan awal tanah runtuh di Jalan Wawasan, Puchong mendapati keretakan longkang monsun menjadi punca insiden yang menjelaskan sembilan rumah pada 16 Disember.

EXCO Infrastruktur Ir Izham Hashim berkata pengaliran air melalui retakan struktur itu mengakibatkan tanah mendap dan runtuh cerun, lapor Bernama.

"Longkang monsun ini besar dan berada di atas tebing. Keretakan longkang

monsun menyebabkan air mengalir ke bawah.

"Bagaimanapun, kita akan menyiasat perkara ini secara teliti melalui konsultan yang akan dilantik," katanya selepas meninjau kawasan itu pada 21 Disember.

Beliau berkata kerja-kerja penyambungan saliran longkang monsun akan dibuat agar air tidak bertakuk di kawasan tanah runtuh tersebut.

"Tujuan utama pemasangan cerucuk itu adalah bagi memastikan tanah di bahagian hadapan rumah yang ter-

jejas lebih selamat dan kukuh selain mengekang pergerakan tanah daripada berlaku," katanya yang menambah kerja baik pulih lain dijangka siap dalam tempoh tiga minggu.

Sementara itu, Ahli Dewan Negeri Kinrara Ng Sze Han berkata pemasangan cerucuk bawah akan dijalankan selepas pemasangan di bahagian atas selesai.

Beliau turut menyampaikan sumbangan sebanyak RM1,000 kepada sembilan ketua isi rumah yang terjejas dalam insiden berkenaan.

7,000 kakitangan bantu pascabah

SHAH ALAM - Hampir 7,000 kakitangan KDEB Waste Management (KDEBWM) sedia membantu operasi pascabah jika berlaku banjir susulan fenomena Monsun Timur Laut.

Pengarah Urusannya Dato' Ramli Mohd Tahir berkata pekerja semua jabatan dengan jumlah terbesar melibatkan lebih 6,000 pekerja am serta 550 pemandu Arm-roll atau Roll-On-Roll-Off (RORO).

"Ini untuk pembersihan awam selepas pascabah. Kakitangan sentiasa bersedia pada bila-bila masa mengikut keperluan operasi pembersihan pascabah."

"Semua 550 RORO juga sudah dipastikan dalam keadaan baik dan boleh bergerak ke semua kawasan kendalian KDEBWM yang terjejas," katanya pada 16 Disember.

Selain itu, KDEBWM memberi tumpuan di 242 lokasi berisiko banjir sebagai perdeian berdepan musim tengkujuh ketika ini.

Galak peniaga sertai program kemahiran

AMPANG JAYA - Peniaga digalak menyertai program pemberdayaan kemahiran digital bagi meningkatkan kebolehan sekali gus mengembangkan perniagaan masing-masing.

EXCO pembudayaan inovasi berkata 3,300 warga Selangor menyertai program Jelajah Saya Digital (JSD) anjuran Perbadanan Ekonomi Digital Malaysia (MDEC) sejak tahun lalu.

Dr Mohammad Fahmi Ngah berkata seramai 547 peserta menguasai kemahiran digital sekali gus meningkatkan jualan dan meraih pendapatan tinggi.

"Terima kasih kepada MDEC kerana membantu anak Selangor dan kejayaan mereka harus dijadikan contoh kepada semua terutama usahawan lain agar dapat meningkatkan ekonomi isi rumah dan menjana ekonomi negeri secara keseluruhannya," katanya pada 17 Disember.

Denda premis operasi tanpa lesen

SHAH ALAM - Majlis Perbandaran Klang (MPK) mengeluarkan 13 kompaun terhadap premis yang beroperasi tanpa lesen di sekitar Pelabuhan Klang.

MPK memaklumkan dua notis arahan berhenti operasi serta-merta juga ditampal di pintu utama premis terbabit dalam satu operasi pada 23 Disember.

"Pemeriksaan melibatkan 26 premis dan daripada jumlah itu hanya tujuh mempunyai lesen perniagaan dan iklan yang sah daripada MPK manakala 15 premis beroperasi tanpa lesen," katanya menerusi Facebook.

Operasi sekitar Lingkaran Sultan Hishamuddin, Selat Klang dan Tanjung Harapan itu turut disertai beberapa jabatan.

KDEBWM serah zakat lebih RM1 juta

SHAH ALAM - KDEB Waste Management (KDEBWM) menyerahkan zakat syarikat bernilai RM1.033 juta kepada Lembaga Zakat Selangor (LZS) pada 20 Disember.

KDEBWM memaklumkan serahan dibuat Pengarah Urusannya Dato' Ramli Mohd Tahir kepada Pengerusi LZS Tan Sri Syed Anwar Jamalullail dalam majlis Iktiraf Muzakki dan Penyerahan Zakat (IMTIYAZ) di Wisma Perbadanan Kemajuan Pertanian Selangor, Shah Alam.

"Sesi penyerahan cek cura menjadi simbol KDEBWM dengan rasminya telah menjadi pembayar zakat bagi kategori Berlian, iaitu syarikat yang membayar sebanyak RM1 juta kepada LZS.

"Semoga bayaran zakat ini memberi banyak kebaikan kepada KDEBWM dan menyemai rasa ihsan dalam setiap warga KDEBWM," katanya menerusi Facebook.

Buka reruai kongsi pencapaian negeri

SHAH ALAM - Kerajaan Negeri akan membuka reruai memaparkan pencapaian Kerajaan Perpaduan sempena sambutan Setahun Bersama Kerajaan Madani peringkat negeri pada bulan depan.

Timbalan Setiausaha Kerajaan Negeri (Pengurusan) Mohamad Zahri Samingon berkata pihaknya akan memberi kerjasama penuh bagi memastikan program berjalan lancar.

"Sambutan ini melibatkan banyak agensi yang mana kita akan buka reruai memaparkan pencapaian Kerajaan Madani sepanjang setahun pentadbiran.

"Selangor sebagai negeri pertama sambutan bagi peringkat negeri akan berkerjasama bagi memastikan semuanya berjalan lancar," katanya pada 20 Disember.

Pinjaman niaga hingga RM50,000

SHAH ALAM - Usahawan yang berhasrat melebarkan perniagaan disaran memohon skim i-Bisnes bawah Yayasan Hijrah Selangor (Hijrah) yang menawarkan pembiayaan sehingga RM50,000.

Skim pinjaman yang dibuka sepanjang masa itu mudah, cepat selain tidak membebankan pemohon.

Sebelum ini, agensi berkenaan memaklumkan i-Bisnes antara skim pembiayaan paling mendapat sambutan dalam kalangan usahawan berbanding skim i-Lestari dan i-Agro berikutnya kadar faedah ditawar rendah.

Selain itu, pembiayaan bawah RM30,000 hanya dikenakan faedah serendah empat peratus, manakala RM31,000 hingga RM50,000 lapan peratus.

Ada keperluan semak tarif air

SHAH ALAM - Semakan semula tarif air perlu dilakukan kerana hampir semua syarikat yang menguruskan bekalan air di negara ini beroperasi dalam keadaan rugi.

EXCO Infrastruktur Ir Izham Hashim berkata kadar tarif air ketika ini terlalu rendah sedangkan perbelanjaan modal (Capex) agak tinggi dan lebih 20 tahun tiada kajian semula pelarasan di Selangor dilakukan.

"Tarif air sudah lebih 20 tahun tidak ada kajian semula. Elektrik kerap juga. Sebenarnya hampir kesemua syarikat



menguruskan air yang ada beroperasi dalam keadaan rugi. Sangat rugi," katanya seperti dilapor Bernama pada 21 Disember.

Sebelum ini, Menteri Sumber Asli Nik Nazmi Nik Ahmad berkata Kerajaan Negeri secara rentas parti, bersetuju supaya tarif air di negeri disemak semula dan satu mekanisme penetapan tarif baharu diwujudkan bagi mengawal selia kadar kenaikan oleh syarikat pengendali dalam mesyuarat Majlis Air Negara.

Dalam pada itu, Ir Izham berkata setakat ini beberapa usaha dilaksanakan Kerajaan Negeri untuk meningkatkan

keuntungan syarikat pengurusan air antaranya pembinaan loji rawatan air baharu dan penggantian paip usang.

Beliau turut memberikan komitmen bahawa penerima program pemberian air percuma Skim Air Darul Ehsan (SADE) yang terdiri daripada golongan berpendapatan rendah (B40) tidak akan terjejas susulan jangkaan kenaikan tarif air baharu.

Katanya hampir 400,000 rakyat Selangor daripada golongan B40 dan berkelayakan mendaftar untuk program tersebut.

Layari pautan ssipr.selangor.gov.my/ untuk maklumat lanjut.

Skrin LED papar infografik kemalangan

Pupuk kesedaran jaga keselamatan

Oleh **SITI ROHAIZAH ZAINAL**

SHAH ALAM - Sebanyak 34 skrin diod pemancar cahaya (LED) dipasang di sembilan pihak berkuasa tempatan (PBT) yang memaparkan infografik statistik kemalangan maut di negeri ini.

Timbalan setiausaha Kerajaan Negeri (pengurusan) berkata skrin yang dipasang mulai bulan lalu bagi memberi kesedaran kepada pengguna jalan raya berhubung kepentingan menjaga keselamatan.

Mohamad Zahri Samingon menjelaskan langkah itu juga berikutan Selangor mencatat jumlah tinggi ke-

malangan jalan raya sebanyak 156,815 kes dan 1,003 kematian sepanjang tahun lalu.

"Bagi Januari hingga Jun lalu, negeri mencatat 84,617 kemalangan jalan raya dengan 558 kematian. Susulan itu, Kerajaan Negeri mengarahkan setiap kawasan PBT memaparkan infografik statistik.

"Infografik ini mula dipaparkan pada 15 November di sembilan PBT membatikan 34 skrin untuk meningkatkan kesedaran pengguna jalan raya pentingnya menjaga keselamatan diri," katanya.

Beliau menghadiri majlis sambutan bulan keselamatan jalan raya peringkat

Selangor 2023 di bangunan pentadbiran negeri pada 20 Disember.

Dalam pada itu, Mohamad Zahri memaklumkan sebanyak 2,769 topi keledar dewasa diagih Majlis Keselamatan Jalan Raya (MKJR) negeri pada 5 Disember dengan peruntukan RM162,000.

"Bagi topi keledar kanak-kanak pula, agihan akan dilaksanakan sebaik sahaja pihak urusetia MKJR Selangor menerima bekalan daripada kilang," jelasnya.

Sementara itu, Pengarah Jabatan Pengangkutan Jalan Selangor Azrin Borhan menyeru semua pihak memainkan peranan dalam memberi kesedaran untuk pengguna mematuhi peraturan jalan raya.

JER manfaat 18,000 keluarga

KUALA SELANGOR - Lebih 18,000 keluarga berpendapatan rendah menerima manfaat daripada 72 penganjuran Jualan Ehsan Rahmah (JER) di Kuala Selangor sejak Ogos.

Pegawai khas ahli parliment Kuala Selangor berkata pihaknya sering memohon kepada Perbadanan Kemajuan Pertanian Selangor (PKPS) supaya program jualan murah kerap diadakan di situ.

"Ini program JER yang ke-72 di Kuala Selangor sejak pilihan raya negeri lalu. Biasanya kita memang buat setiap bulan di beberapa lokasi dan di Puncak Alam merupakan yang terakhir untuk tahun ini," kata Mohd Maskor Tumiran.

Beliau mewakili Ahli Parliment Kuala Selangor Datuk Seri Dr Dzulkefly Ahmad meninjau program JER di perumahan Fasa 2 Bandar Puncak Alam di sini

pada 26 Disember.

Sementara itu, Timbalan Pengerusi Kawasan Rukun Tetangga (KRT) Mohd Razib Mohd Talib berkata pihaknya mengagih nombor giliran kepada penduduk yang benar-benar memerlukan.

Menurutnya, pihak jawatankuasa menyenaraikan dan menghubungi keluarga yang layak bagi memastikan program JER mencapai sasaran ditetapkan.

Baiki paip tiga rumah kebajikan

SHAH ALAM - Pengurusan Air Selangor Sdn Bhd (Air Selangor) membaik pulih paip dalaman tiga rumah kebajikan kanak-kanak sekitar Selangor dan Kuala Lumpur.

Menurut hantaran Facebook, Program Sesama Mara melibatkan Lighthouse Children Welfare Home Associa-

tion, Praise Emmanuel Children's Home dan Overcomer Care Centre.

Bantuan bawah program tanggungjawab sosial korporat itu turut menyumbang keperluan asas seperti barang dapur, makanan dan kelengkapan rumah.

Air Selangor juga membersihkan

kawasan Lighthouse Children Welfare Home Association melibatkan 17 sukarelawan Hydro Heroes yang terdiri daripada warga kerjanya.

Mana-mana pihak yang berminat menyumbang makanan boleh layari pautan www.airselangor.com/sesama-mara/



KAWAL.... Lembaga Urus Air Selangor (LUAS) memantau risiko pencemaran sumber air susulan tumpahan minyak diesel dalam kemalangan di Genting Sempah, Pahang pada 23 Disember. Foto Facebook LUAS

Promosi negara Asia, Eropah

Kempen tarik pelancong

Oleh ZAREEF MUZAMMIL

KLANG - Kempen pelancongan global dikenali "Splendid Selangor, Take Me Anywhere!" akan diteruskan ke beberapa negara tahun depan bagi menarik lebih ramai pelancong asing ke negeri ini.

EXCO Pelancongan Dato' Ng Suee Lim berkata misi promosi produk pelancongan sejarah Melawat Selangor 2025 membabitkan negara seperti China, Indonesia, Singapura, Jepun, India, Laos dan Jerman.

"Kita sudah rangka Tahun Melawat Selangor 2025 termasuk strategi menarik lebih ramai pelancong ke negeri ini. Maka tahun depan sesi lawatan bagi mempromosi (produk pelancongan) ke luar negara akan dilakukan. Sesi padanan perniagaan (B2B) juga akan dibuat di negara terbabit.

"Kita mahu memperkasa industri pelancongan termasuk ekonomi Selangor dengan lebih cepat memandangkan sektor ini antara yang boleh menjana ekonomi dalam pascapandemik Covid-19," katanya pada 20 Disember.

Beliau juga berharap peruntukan untuk merancakkan sektor pelancongan ditingkatkan kepada RM10 juta

pada 2025.

"Bajet RM6 juta tidak cukup (untuk memperkasa) industri pelancongan. Jika boleh RM10 juta ke atas, namun kita kena memahami situasikekangan kewangan.

"Bagaimanapun saya yakin pada 2025, kita akan dapat peruntukan lebih sebab kita nampak lonjakan kemasukan pelancong ke Selangor," katanya lagi.

Dato' Menteri Besar Dato' Seri Amirudin Shari ketika membentang Belanjawan Selangor 2024 memaklumkan beberapa usaha dimulakan tahun depan sebagai persediaan menjayakan Tahun Melawat Selangor 2025.

Sementara itu, kempen yang dilancarkan di Taiwan baru-baru ini bagi menarik lebih ramai pelawat antarabangsa khasnya negara itu ke Selangor tahun depan.

"Selangor menerima 75,783 pelancong Taiwan sebelum pandemik Covid-19 melanda, malangnya jumlah itu menurun kepada 68 peratus disebabkan sekatan perjalanan antarabangsa sepanjang pandemik.

"Bagaimanapun, kita dapat melihat lonjakan pelancong dari Taiwan tahun lepas seramai 15,503 orang selepas larangan ditarik balik dengan 59 penerbangan seminggu," katanya.

Taman
Bestari
Jenjarom
Rumah Teres 2 Tingkat
Hakmilik Kekal

Hanya Tinggal 14 unit Lot Bumiputera !!
7% Rebate untuk Bumiputera

Procedure Development By:
CNCD
CHIN NAM CITY DEVELOPMENT SDN BHD.
NO.16-D, Jalan Suarasa 8/4,
Bandar Tun Hussein Onn,
43200 Cheras, Selangor Darul Ehsan.
Tel : 03-9081 7731

Permit No.: 30188000037/0193(A) Tempoh Sah: 14/9/22-13/9/27 No. Permit Iklan & Jualan: 30194-1/12-2024/0366(A)-L Tempoh Sah: 06/12/2022 sehingga 05/12/2024
Nama Pemaju: CHIN NAM CITY DEVELOPMENT SDN BHD. Tel: 03-9081 7731
Syarat dan Ketentuan: Tarikh Dibangunkan Sejak: Masa Persempaduan Jualan (Min.): MYR628,000.00 Harga Jualan (Max.): MYR1,050,000.00 Bilangan Unit: 27 Baki Unit Yang Belum Dipenuhi: 14 Unit
Pihak Berkuasa yang meluluskan: Majlis Perbandaran Kuala Langat No. Rejakan: MPKL/KB/1/4/6/2021/A/13

IKLAN INI TELAH DILULUSKAN OLEH JABATAN PERUMAHAN NEGARA

Tiga bulan laksana pemutihan kilang

KLANG - Pengusaha kilang tanpa kebenaran di negeri ini diberi tempoh tiga bulan untuk melaksanakan proses pemutihan selepas notis dikeluarkan, maklum EXCO kerajaan tempatan.

Dato' Ng Suee Lim menegaskan rampasan tanah akan dibuat serta-merta sekiranya pengusaha gagal berbuat demikian dalam tempoh ditetapkan.

Beliau mengakui banyak kelonggaran dan tawaran pemutihan diberi kepada pemilik kilang terbabit sejak 2006 namun sambutan tidak menggalakkan.

"Kali ini kita beri dasar dan tawaran baru (untuk proses pemutihan) tetapi pada masa sama penguatkuasaan itu akan dijalankan.

"Sekiranya mereka ingkar, penguatkuasaan mesti dijalankan dan kita tidak akan beri peluang. Selepas notis dihantar mereka kena datang buat pemutihan," katanya pada 20 Disember.

Pada 15 Disember, Suee Lim menggesa pengusaha kilang tanpa kebenaran di Selangor untuk tampil melaksanakan proses pemutihan bagi mengelak tindakan rampasan tanah.

Jika tanah dirampas, katanya, pemilik perlu membayar premium tanah mengikut jumlah ditetapkan berikutan status bertukar kaveat iaitu dimiliki kerajaan.

Ayam, beras laris terjual dua jam

KAJANG - Sebanyak 500 ekor ayam habis dijual dalam tempoh dua jam di Jualan Ehsan Rahmah (JER) anjuran Perbadanan Kemajuan Pertanian Selangor (PKPS) peringkat Dewan Undangan Negeri Balakong.

Penyelaras Jualannya Mohamad Nazif Zulkifle berkata pihaknya menyediakan 150 pek ayam potong dan 350 ekor ayam bulat yang dijual pada harga RM10.

"PKPS membawa 300 telur serta beras. Ketiga-tiga barang ini terutama ayam antara tumpuan berikutan harga murah berbanding pasaran," pada 23 Disember.

Beliau berkata sambutan pengunjung juga meriah seawal 8 pagi walaupun JER dijalankan pada musim perayaan dan cuti sekolah.

Pada 22 September, EXCO Pertanian Ir Izham Hashim berkata Selangor membelanjakan subsidi berjumlah RM40 juta untuk melaksanakan jualan murah di hampir 2,850 lokasi yang memanfaatkan lebih 5 juta rakyat.

Anjur 36 kali JER sejak 2022

SHAH ALAM - Jualan Ehsan Rahmah (JER) peringkat Dewan Undangan Negeri Kota Kemuning mendapat permintaan tinggi sejak dianjurkan pada 2022 di lokasi sama.

Ahli Majlis Perwakilan Penduduk Zon 10 Saribanon Saibon berkata program kendalian Perbadanan Kemajuan Pertanian Selangor (PKPS) itu dianjurkan 36 kali di Dewan MBSA Pulai Seksyen 27A di sini.

"Rata-rata penduduk di sini minta JER dianjurkan lebih kerap berikutan harga yang ditawarkan murah dan berpatutan, membantu rakyat terutama golongan berpendapatan rendah."

"Saya cadangkan PKPS menambah lagi kuantiti barang terutama ayam dan telur kerana dua produk ini mendapat permintaan sangat tinggi," katanya pada 23 Disember.

Bantu peminjam lunas pembiayaan

SHAH ALAM - Yayasan Hijrah Selangor (Hijrah) menawarkan pelan pemulihan pembiayaan kepada peminjam yang berdepan masalah kewangan.

Agensi itu memaklumkan, menerusi pelan berkenaan pihaknya akan membantu usahawan menyusun semula jadual pembayaran balik.

"Kami bersedia membantu anda dengan tawaran Pelan Pemulihan Pembiayaan bagi menyusun semula jadual pembayaran balik anda."

"Hubungi pegawai kutipan di 18 Cawangan Hijrah Selangor untuk maklumat lanjut," katanya yang turut menghargai komitmen usahawan yang tidak culas membuat bayaran semula pembiayaan.

Layari www.hijrahselangor.com/risalah-skim-hijrah.../ atau mikrokredit.selangor.gov.my/ untuk maklumat lanjut.

Kejohanan perahu layar jana ekonomi

KUALA LANGAT - Kerjasama Majlis Perbandaran Kuala Langat (MPKL) dan Persatuan Sukan Layar Selangor (SYA) menganjurkan kejohanan Perahu Layar Terbuka 2023 di Pantai Batu Laut di sini membantu penduduk setempat menjana pendapatan.

Wakil rakyat Tanjong Sepat berkata usaha berkenaan juga membuka peluang promosi kawasan pantai berkenaan yang berjaya menarik kedatangan pelancong asing.

"Kawasan di Pantai Batu Laut ini adalah tarikan pelancong, dan dengan usaha MPKL mengadakan kejohanan seperti ini pengunjung makin bertambah ramai apabila peserta datang bersama keluarga mereka termasuk

dari luar negara, duduk dalam khemah untuk menyaksikan kejohanan.

"Medan selera makanan juga dilihat sentiasa penuh sepanjang kejohanan yang memberi ruang peniaga tempatan jana pendapatan."

"Saya berharap MPKL, pengurus perwakilan penduduk, jabatan dan agensi di daerah ini akan terus menjadikan Pantai Batu Laut dan Kuala Langat sebagai lokasi penganjuran kejohanan seperti ini," kata Borhan Aman Shah.

Beliau menghadiri majlis penutup kejohanan berkenaan di Pantai Batu Laut, Kuala Langat di sini pada 24 Disember.

Borhan yang juga EXCO negeri ber-

kata objektif utama kejohanan adalah menyediakan platform untuk bakat muda mengasah kemahiran dalam sukan perahu layar.

"Penyertaan di venue (tempat) berbeza ini dapat memberikan pendedahan dan persediaan untuk melahirkan pelayar-pelayar yang berpotensi hingga disegani di peringkat kebangsaan dan antarabangsa," katanya.

Seramai 80 atlet dalam dan luar negara menyertai kejohanan perahu layar bermula 22 hingga 24 Disember.

Memasuki edisi kesembilan, 11 kategori dipertandingkan antaranya kelas Optimist, ILCA, International 420, RS One dan Techno 293 yang disertai 10 peserta berumur 8 hingga 20 tahun.

Enggan terlepas berbelanja

Gigih kayuh basikal ke jualan murah

Oleh **NAS NORZIELA NASBAH**

KAJANG - Seorang wanita gigih mengayuh basikal ke program Jelajah Ehsan Rakyat (JER) kendalian Perbadanan Kemajuan Pertanian Selangor (PKPS) di Kampung Jambu di sini.

Lee Sau Ling, 54, datang seawal 8 pagi untuk mendapatkan nombor giliran dan membeli pelbagai barang asas yang murah berbanding harga pasaran.

"Saya sudah biasa menunggang basikal ke mana-mana sahaja. Dengan basikal ini, saya mencari rezeki mengumpul barang kitar semula. Jadi tiada masalah untuk saya membeli sebotol minyak, beras, telur dan ayam untuk dibawa balik."

"Saya bersyukur kerana berpeluang

dapat berbelanja di jualan murah seperti ini. Harap ia dapat diteruskan kerana bantu ringankan beban keluarga berpendapatan rendah," katanya sempena JER peringkat Dewan Undangan Negeri Balakong pada 23 Disember.



Suri rumah Radzilah Ujang, 54, pula menanti program jualan murah setiap hujung minggu bagi meringankan kos belanja dapur.

"Kos harga barang semakin meningkat. Melalui jualan murah inilah saya sekeluarga dapat mengurangkan kos membeli bahan asas seperti ayam, telur dan beras."

"Saya sekeluarga akan mengikuti jadual JER ini di Facebook PKPS. Mana yang berdekatan atau berkesempatan pergi, saya tidak lepaskan peluang," katanya yang tinggal di Seksyen 4 Tambahan, Bangi.



Ibu tunggal Zawiyah Zainudin, 58, berterima kasih atas inisiatif Kerajaan Negeri bagi meringankan beban keluarga yang memerlukan.

"Cucu akan datang setiap hari duduk bersama saya. Jadi keperluan bahan mentah asas seperti beras, minyak dan ayam antara yang wajib perlu ada di rumah."

"Dengan jualan murah seperti ini, saya dapat Jimatkan kos perbelanjaan kerana harga yang ditawarkan jauh lebih murah daripada pasaran luar," katanya yang tinggal di Taman Kantan Permai.

Program JER menawarkan ayam RM10 seekor, daging pejal segar (RM10 setiap pek), telur gred B (RM10 sepan), ikan kembung (RM6 setiap pek), minyak masak lima kg (RM25) dan beras lima kg (RM10).

Teruskan subsidi jualan murah

SHAH ALAM - Pengunjung Jualan Ehsan Rahmah (JER) berharap program tersebut diteruskan tahun depan dan dianjur lebih kerap di setiap Dewan Undangan Negeri (DUN).

Peniaga Muhammad Nur Islam Muhammad Shah, 35, berkata Kerajaan Negeri perlu meneruskan pemberian subsidi untuk program itu kerana manfaatnya lebih menyeluruh kepada seisi keluarga.

"Hari ini saya beli dua ekor ayam, dua paket ikan, dua kampit beras, empat papan telur dan sebotol minyak masak

dengan harga semuanya hanya RM123. Memang banyak penjimatatan berbelanja di sini."

"Bagi saya inisiatif Kerajaan Negeri melaksanakan subsidi ini amat bagus berbanding memberi wang secara terus kepada rakyat," katanya sempena JER peringkat DUN Batu Tiga di Kampung Kebun Bunga pada 24 Disember.



Pandangan sama dinyatakan suri rumah Wan Rohasina Wan Abdullah, 37, yang menyifatkan program ini men-

jimatkan perbelanjaan bulanannya.

"Saya belanja tidak sampai RM100 beli ayam, beras dan telur serta beberapa barang kering lain. Di rumah tinggal lapan beranak termasuk suami. Insya-Allah, bekalan ini cukup untuk keperluan keluarga sekurang-kurangnya seminggu."

"Cuma saya cadangkan kepada pengangur supaya dapat menambah lagi kuantiti ayam segar kepada pengunjung pada JER akan datang," katanya.

panca warna

Menang demi rakyat



Oleh ABDUL RAHIM SABRI
Foto HAFIZ OTHMAN

Tahun 2023 bermula era baharu di Putrajaya apabila Kerajaan Perpaduan terbentuk selepas Datuk Seri Anwar Ibrahim dilantik perdana menteri pada 24 November 2022.

Ia segera disambut pentadbiran Selangor dengan merancang Kerajaan Perpaduan di peringkat negeri, kerjasama Pakatan Harapan (HARAPAN) bersama Barisan Nasional (BN), khususnya menjelang pilihan raya negeri pada Ogos.

Dalam detik bersejarah itu, HARAPAN bersama BN menentang Perikatan Nasional. Walau saingannya sengit, seperti juga pilihan raya umum 19 November 2022, parti Kerajaan Perpaduan kekal menguasai Selangor.

Dato' Seri Amirudin Shari diberi amanah mengetuai Kerajaan Negeri buat penggal kedua pada 21 Ogos.

Dengan kerjasama HARAPAN-BN itu, buat julung kali, pemimpin BN dan bekas Ketua Pembangkang Datuk Rizam Ismail diangkat sebagai EXCO bagi portfolio kemajuan luar bandar, kemampanan kampung tradisi dan perpaduan nasional.

Usaha memupuk perpaduan ini sejahtera pula dengan titah Duli Yang Maha Mulia Sultan Selangor Sultan Sharafuddin Idris Shah Alhaj yang menggesa pemimpin politik menjaga keharmonian kaum dan mengelak perpecahan rakyat.

Pemilihan Amirudin sebagai peneraju Kerajaan Negeri membolehkan wawasan, strategi dan program pembangunan penggal lalu diteruskan dengan lancar, khususnya Rancangan Selangor Pertama (RS-1), dasar lima tahun hingga 2025.

Tahun 2023 juga mencatat pencapaian menarik apabila Selangor muncul penyumbang makin penting kepada Keluaran Dalam Negara Kasar (KDNK) apabila merekod 25.5 peratus pada 2022 berbanding 24.8 peratus tahun sebelumnya.

Rizab negeri pula cukup kukuh, mencecah RM3.71 bilion (setakat 9 November). Dengan kekuataan itu, Selangor mahu melangsangkan sepenuhnya baki hutang dengan Kerajaan Persekutuan sebanyak lebih RM19 juta.

Kestabilan Kerajaan Perpaduan di Selangor membolehkan pembangunan semula Kompleks Sukan Shah Alam di atas lebih 80 hektar diteruskan. Selain kemudahan rekreasi untuk orang ramai, ia memuatkan masjid, ruang niaga dan hotel.

Kebenaran untuk kerja perobohan stadium bersejarah itu, yang rosak sejak banjir 2006, diperolehi daripada Majlis Bandaraya Shah Alam pada 22 Disember dan dijangka siap menjelang 2026.

Namun bukan sahaja kerancakan ekonomi dan kegiatan sukan diberikan perhatian. Kerajaan turut mengukuhkan kefahaman agama melalui pengajian kitab tersohor seperti Festival Turath Islami Selangor selama seminggu mulai 20 Mei.

Lembah Klang Raya

Selain mengadakan pengajian kitab turath (warisan) ke seluruh daerah mulai tahun depan, Selangor juga mahu meningkatkan pengajian Islam melalui kerjasama dengan Universiti Al-Azhar.

Manakala terjemahan lengkap Ihya' Ulumuddin, kitab ulung Imam al-Ghazali, sudah bermula sejak awal tahun. Usaha ini pula lanjutan Siri Pencerahan Selangor, projek terjemahan lebih 70 karya penting dunia sejak 2016.

Selain bidang agama dan pemikiran, ekonomi dan sukan, Kerajaan Negeri sedang menyusun semula kehidupan bandar dan luar bandar khususnya empat pihak berkuasa tempatan (PBT): Petaling Jaya, Subang Jaya, Shah Alam dan Klang.

Bagi memastikan keselesaan 3.4 juta warga kota di empat bandar raya ini, Kerajaan Negeri merancang beberapa langkah penting termasuk Enakmen Lembah Klang Raya.

Idea menyusun pentadbiran itu antara lebih 50 program dalam manifesto parti Kerajaan Perpaduan ketika pilihan raya negeri Ogos lalu. Tanpa lengah, ia terus dibentang dalam Belanjawan Selangor 2024.

Untuk meningkatkan lagi perkhidmatan, Suruhanjaya Pihak Berkuasa Tempatan akan dibahas di Dewan Negeri Selangor tahun depan. Sasarannya jelas, PBT harus mampu berkhidmat dengan pantas, boleh bertindak dalam tempoh 24 jam selepas aduan.

Begitu juga dua daerah penting di selatan dan utara Selangor. Selain memajukan projek Gerbang Maritim Selangor (SMG) di sepanjang Sungai Klang, Kerajaan Negeri melaksanakan projek

TARIKH PENTING SELANGOR 2023

26 JANUARI-10 FEBRUARI Pameran dan libat urus awam pembangunan Kompleks Sukan Shah Alam (KSSA) bagi menaik taraf stadium

4 FEBRUARI Susulan pembentukan Kerajaan Perpaduan di Putrajaya, Umno Selangor setuju kerjasama dengan Pakatan Harapan (HARAPAN) dalam Kerajaan Negeri

7 FEBRUARI Sekretariat Kerajaan Perpaduan, di peringkat nasional, tubuh tiga jawatankuasa mengenai dasar kerajaan, pilihan raya dan strategi

13 MAC DYMM Sultan Selangor berangkat ke sidang Dewan Negeri Selangor terakhir sebelum dibubarkan pada 23 Jun untuk pilihan raya negeri ke-15

18 MEI Kerajaan Negeri jelaskan Projek Skim Jaminan Air Mentah (SJAM) dijangka beroperasi awal 2024

20-25 MEI Festival Turath Islami Selangor julung kali diadakan, tampil ulama terkenal Dr Ali Jumaah Muhammad Abdul Wahab, Dr Aqil Siradj dan Baba Ismail al-Fathoni.

31 JULAI HARAPAN dan Barisan Nasional negeri lancar manifesto pilihan raya Tawaran Kita Selangor Lima Tekad untuk Lima Tahun

4 OGOS Skim insurans INSAN Takaful dilancar di Bangi. Skim Insuran Am Selangor (INSAN) dilancar Oktober 2022

12 OGOS Gabungan HARAPAN-BN menang 34 daripada 56 kerusi Dewan Negeri Selangor. Perikatan Nasional kuasai 22 kerusi

21 OGOS Amirudin dan barisan EXCO Selangor angkat sumpah di Istana Alam Shah, Klang. Beliau dilantik menteri besar bagi penggal kedua

19 SEPTEMBER Amirudin mengetuai istiadat angkat sumpah 56 Ahli Dewan Negeri, Lau Weng San pula dipilih sebagai Speaker

6-12 OKTOBER Kerajaan Negeri melawat dan berdialog dengan siswa Selangor di beberapa negara Timur Tengah, rancang bina asrama pelajar di Mesir

10 NOVEMBER Belanjawan 2024 dengan peruntukan RM2.53 bilion dibentang, tumpu hasrat laksanakan sebahagian program penting dalam manifesto Tawaran Kita Selangor: Lima Tekad untuk Lima Tahun

pembangunan Wilayah Pembangunan Bersepadu di Selangor Selatan (IDRISS) dan Kawasan Pembangunan Sabak Bernam (SABDA).

Semuanya ini untuk rakyat Selangor. Kuasa politik untuk kesejahteraan semua. Kerajaan Negeri mengotakkan slogan pentadbirannya Kita Selangor, Maju Bersama.

Menongkah cabaran



Oleh NAZLI IBRAHIM

Kerajaan Perpaduan terbentuk hasil persefakatan gabungan parti-parti politik pada penghujung 2022 terpaksa mengharungi pelbagai cabaran tahun ini.

Selain isu 3R (agama, kaum dan raja) yang mengugat kestabilan politik, pentadbiran diketuai Perdana Menteri Datuk Seri Anwar Ibrahim juga bergelut dengan isu ekonomi seperti penyusutan nilai ringgit dan kenaikan harga barang.

Namun, semua halangan itu diatasi satu-persatu dengan pendekatan berkesan dengan memperkenal Malaysia Madani, pembentangan belanjawan persekutuan yang merangsang ekonomi pascawabak dan mengukuhkan dasar luar negara.

Bermula dengan menyelesaikan perkara tertuggak dalam Perjanjian Malaysia 1963, Anwar berhasil meraih kepercayaan Sarawak dan Sabah, sekali gus menguatkan Kerajaan Perpaduan.

Dasar-dasar menangani isu pokok yang membenggu rakyat terbanyak segera dirangka dan dilaksana. Antaranya dasar anti-Ali Baba dan dasar gaji progresif yang dinanti-nantikan banyak pihak.

Kejayaan Malaysia mengenepikan tuntutan kumpulan Sulu untuk menyita aset negara di mahkamah-mahkamah negara Eropah membuktikan keberkesanan dasar luar negara oleh Kerajaan Perpaduan.

Selain itu, kelantangan Anwar membela hak warga Palestin juga menjadi perhatian antarabangsa dan meningkatkan pengaruh Malaysia dalam kalangan negara-negara Islam.

Dalam Himpunan Malaysia Bersama Palestin di Axiata Arena di Kuala Lumpur pada 24 Oktober,

perdana menteri mendedahkan menerima tekanan dalam bentuk teguran dan ugutan negara tertentu kerana memperjuangkan rakyat Palestin.

Namun, ia tidak menghalang Anwar menyuarakan isu berkenaan kepada pemimpin dunia semasa sidang Kerjasama Ekonomi Asia-Pasifik (Apec) di San Francisco, Amerika Syarikat dari 14 hingga 17 November 2023.

Tatkala itu suhu politik tahun ini membahang dengan pilihan raya enam negeri yang menyaksikan status quo buat gabungan Pakatan Harapan (HARAPAN)-Barisan Nasional (BN).

Kehangatan PRN enam negeri tertumpu kepada ucapan Menteri Besar Kedah Datuk Seri Muhammad Sanusi Md Noor yang mempertikai pelantikan Dato' Menteri Besar Selangor dan penubuhan Kerajaan Perpaduan dalam ceramah politiknya.

Majoriti dua pertiga

Susulan itu, anggota Dewan Diraja Selangor membuat laporan polis dan pada 18 Julai beliau didakwa di Mahkamah Sesyen Selayang atas tuduhan menghasut.

Tidak lama selepas PRN, bekas Perdana Menteri Tan Sri Muhyiddin Yassin dibebas daripada pertuduhan menggunakan kedudukan untuk rasuah pada 15 Ogos.

Sementara Presiden Umno Datuk Seri Dr Ahmad Zahid Hamidi dilepas tanpa dibebas pada 4 September atas pertuduhan pecah amanah, rasuah dan pengubahan wang haram milik Yayasan Akalbudi.

Walau diura-ura akan mengalah sokongan kepada PN pada Ogos, pemimpin Umno terus mendukung Kerajaan Perpaduan.

Sokongan majoriti dua pertiga semakin kukuh apabila lima ahli parlimentari Parti Pribumi Bersatu Malaysia (Bersatu) menyokong perdana menteri meski ia mencetuskan perdebatan mengenai larangan lompat parti.

Dukungan kukuh ini membolehkan usaha membanteras rasuah berprofil tinggi dilaksana. Tahun ini beberapa tokoh politik termasuk bekas menteri disiasat, didakwa dan dijatuhi hukuman di mahkamah.

Pada 7 Ogos, Suruhanjaya Pencegahan Rasuah Malaysia (SPRM) cuba mengesan menantu Muhyiddin, Muhammad Adlan Berhan, 48, dan seorang lagi individu, Mansoor Saat, 69.

Mereka dikehendaki bagi membantu siasatan isu rasuah dan penyelewengan berhubung projek berkaitan pendaftaran, pengambilan serta penyimpanan biometrik pekerja asing di sebuah kementerian.

Bagaimanapun, semakan SPRM dengan Jabatan Imigresen mendapati masing-masing meninggalkan Malaysia pada 17 Mei dan 21 Mei serta tiada rekod masuk kembali ke negara ini.

Pada 9 November, Ahli Parliment Muar Syed Saddiq Syed Abdul Rahman dipenjara tujuh tahun, dua sebatan dan denda RM10 juta kerana didapati bersalah pecah amanah, salah guna harta dan pengubahan wang haram oleh Mahkamah Tinggi Kuala Lumpur.

Seterusnya, SPRM menyita Menara Ilham di Kuala Lumpur selepas bekas Menteri Kewangan Tun Daim Zainuddin enggan bekerjasama mengisytihar asetnya.

Tidak ketinggalan Suruhanjaya Persaingan Malaysia mengenakan penalti RM415.5 juta terhadap kartel makanan ayam yang menjadi antara berita besar menutup tirai tahun ini.

Liku-liku 2023

22 JANUARI Perdana menteri umum agihan perbelanjaan tahunan serta lantikan wakil Sabah dan Sarawak dalam Lembaga Hasil Dalam Negeri, antara perkara utama Perjanjian Malaysia 1963

7 FEBRUARI Datuk Seri Anwar Ibrahim mempergesekan mesyuarat pertama Sekretariat Kerajaan Perpaduan.

Perjanjian persefahaman kerjasama dimeterai lima gabungan parti politik iaitu Pakatan Harapan (HARAPAN), Barisan Nasional (BN), Gabungan Parti Sarawak (GPS), Gabungan Rakyat Sabah (GRS) dan Parti Warisan Sabah (WARISAN) pada 16 Disember 2022

13 FEBRUARI Yang di-Pertuan Agong Al-Sultan Abdullah Ri'ayatuddin Al-Mustafa Billah Shah menzahirkan harapan di Parlimen, Anwar menjadi perdana menteri terakhir dilantik di bawah pemerintahan Baginda

24 FEBRUARI Anwar bentang belanjawan persekutuan 2023 pertama kali. Belanjawan itu tertangguh kerana pilihan raya umum pada November 2022

18 MAC Datuk Seri Dr Ahmad Zahid Hamidi dan Datuk Seri Mohamad Hasan kekal presiden dan timbalan presiden selepas usul tambahan perhimpunan agung parti itu supaya dua jawatan tertinggi tidak dipertanding pada pemilihan Umno 2023-2026 dilulus Pendaftar Pertubuhan.

14 MEI Pimpinan utama 19 parti politik gabungan Kerajaan Perpaduan berhimpun pada konvensyen nasional pertama di Pusat Dagangan Dunia Kuala Lumpur

9 JUN Anwar (bekas timbalan presiden Umno) hadir ke perhimpunan agung parti itu selepas 25 tahun disingkirkan pada 1998. Ketua gabungan HARAPAN-BN hadir ke perhimpunan sebagai tetamu kehormat

11 JULAI Perdana menteri memaklumkan kerajaan dalam proses merangka dasar anti-Ali Baba bagi menangani kesan negatif budaya itu terhadap ekonomi. Kementerian Ekonomi dan Jabatan Peguam Negara dengan agensi kerajaan berkaitan

13 JULAI Kerajaan Perpaduan cadang laksana Dasar Gaji Progresif. Menerusinya, gaji pekerja seluruh negara ditingkatkan. Dasar dijangka laksana April atau Mei 2024

12 OGOS Pilihan raya enam negeri berlangsung sengit bagaimanapun keputusannya status quo. HARAPAN-BN mengekalkan Pulau Pinang, Selangor dan Negeri Sembilan. Manakala Kedah, Kelantan dan Terengganu pada pembangkang

Pelbagai peristiwa bersejarah tercatat sepanjang 12 bulan lepas. Selain pilihan raya enam negeri dan rombakan kabinet, Kerajaan Perpaduan cuba menstabilkan politik dan merancakkan ekonomi negara.
Dasar baru diperkenal bagi mereformasi ekonomi. Kerajaan bertambah yakin untuk mengambil tindakan tegas terhadap rasuah. Wartawan NAZLI IBRAHIM menyorot tarikh penting sepanjang 2023.

1 SEPTEMBER Anwar yang juga menteri kewangan melancar Pelan Induk Perindustrian Baharu (NIMP). Pelan itu meningkatkan nilai tambah sektor pembuatan kepada RM587.5 bilion menjelang 2030

9 SEPTEMBER Parlimen Pulai dan DUN Simpang Jeram kekal milik HARAPAN selepas PRK serentak itu dimenangi Suhaizan Kayat dan Nazri Abdul Rahman.

PRK dua kerusi itu diadakan susulan penyandangnya Menteri Perdagangan Dalam Negeri dan Kos Sara Hidup Datuk Seri Salahuddin Ayub meninggal dunia pada 23 Julai.

GPS juga mengekalkan DUN Jepak dalam PRK pada 4 November susulan kematiang Datuk Talib Zulpilip pada 15 September.

Perikatan Nasional (PN) turut kekal di Parlimen Kemaman menerusi Menteri Besar Terengganu Datuk Seri Dr Ahmad Samsuri Mokhtar dalam PRK pada 2 Disember

11 SEPTEMBER Kajian Separuh Penggal Rancangan Malaysia Ke-12 (RMK12) dibentang. Perdana menteri umum peningkatan RM15 bilion untuk siling perbelanjaan rancangan, menaikkan peruntukan RMK12 kepada RM415 bilion.

RMK12 dijajar semula dengan dasar Ekonomi Madani bertujuan memperkasa dan merancakkan ekonomi bagi tempoh 10 tahun

7 OKTOBER BN kekalkan DUN Pelangai dalam PRK yang diadakan selepas EXCO Pahang Datuk Johari Harun maut nahas udara di Bandar Elmina, Shah Alam pada 17 Ogos

9 OKTOBER Menteri di Jabatan Perdana Menteri (Undang-undang dan Reformasi Institusi) Datuk Seri Azalina Othman Said di Dewan Rakyat berkata dua pasukan petugas khas ditubuh mengkaji pemisahan kuasa Peguam Negara dan Pendakwa Raya.

Turut dibentang Rang Undang-Undang Kewangan Awam dan Tanggungjawab Fiskal 2023 oleh Timbalan Menteri Kewangan I Datuk Seri Ahmad Maslan bagi bacaan kali pertama di Dewan Rakyat. Akta memastikan tahap ketelusan tinggi dan pengurusan ekonomi lebih bertanggungjawab

13 OKTOBER Anwar membentang Belanjawan 2024. Disifat belanjawan terbesar, ia memperuntuk RM303.8 bilion untuk belanja mengurus, RM90 billion bagi belanja pembangunan dan RM2 bilion untuk simpanan luar jangka

27 OKTOBER Sultan Johor Sultan Ibrahim Ibni Sultan Iskandar dilantik sebagai Yang di-Pertuan Agong ke-17. Pelantikan selama lima tahun itu berkuat kuasa 31 Januari 2024.

Sultan Perak Sultan Nazrin Muizzuddin Shah kekal sebagai timbalan Yang di-Pertuan Agong bagi tempoh sama

28 NOVEMBER Ahli Parlimen Bukit Gantang Datuk Syed Abu Hussin Hafiz Syed Abdul Fasal menjadi pemimpin PN kelima mengisytihar menyokong Anwar dan Kerajaan Perpaduan.

Tindakan itu dimulakan ahli Parlimen Kuala Kangsar Datuk Iskandar Dzulkarnain Abdul Khalid pada 12 Oktober, diikuti Datuk Suhaili Abdul Rahman (Labuan, 30 Oktober), Mohd Azizi Abu Naim (Gua Musang, 7 November) dan Zahari Kechik (Jeli, 8 November)

11 DISEMBER Malaysia mengheret penimbang tara Sepanyol yang dilantik secara tidak sah, Dr Gonzalo Stampa ke Mahkamah Jenayah Madrid atas dakwaan menghina mahkamah dan berulang kali mengingkari perintah mahkamah yang membatalkan pelantikannya sebagai penimbang tara dalam kes pertikaian Sulu.

Terdahulu kerajaan berjaya mengenepikan tuntutan kumpulan Sulu di Mahkamah Luxembourg (24 Januari), Mahkamah Perlembagaan Sepanyol (2 Februari) dan Mahkamah Perancis (16 November) sekali gus melindungi harta, hak dan kedaulatan negara

12 DISEMBER Kabinet Kerajaan Perpaduan dirombak. Bilangan Jemaah Menteri meningkat daripada 28 kepada 31 orang. Selain perubahan portfolio, empat pemimpin ditambah antaranya Gobind Singh Deo dan Datuk Seri Dr Dzulkefly Ahmad

18 DISEMBER Menara Ilham setinggi 60 tingkat di Jalan Binjai, Kuala Lumpur dipercayai milik keluarga Daim disita Suruhanjaya Pencegahan Rasuah Malaysia (SPRM).

Tindakan itu untuk mengelakkan tindakan yang boleh mengganggu siasatan atas kesalahan rasuah dan penggubahan wang haram

20 DISEMBER Syarikat perkapalan Israel, ZIM dilarang berlabuh di mana-mana pelabuhan Malaysia

23 DISEMBER Lima syarikat pengisar makanan ayam didenda RM415.5 juta mengikut Akta Persaingan 2010 kerana membentuk kartel menetap harga makanan ayam yang berpotensi mengganggu pasaran.

Suruhanjaya Persaingan Malaysia (MyCC) mengenakan penalti terhadap Leong Hup Feedmill (M) Sdn Bhd; FFM Berhad; Gold Coin Feedmills (M) Sdn Bhd; Dindings Poultry Development Centre Sdn Bhd dan PK Agro-Industrial Products (M) Sdn Bhd





2024

selangorkini

JANUARI						
A	I	S	R	K	J	S
1	2	3	4	5	6	
7	8	9	10	11	12	13
14	15	16	17	18	19	20
21	22	23	24	25	26	27
28	29	30	31			

1 - Tahun Baharu
25 - Hari Thaipusam

FEBRUARI						
A	I	S	R	K	J	S
					1	2
4	5	6	7	8	9	10
11	12	13	14	15	16	17
18	19	20	21	22	23	24
25	26	27	28	29	30	

10 & 11 - Tahun Baharu Cina

MAC						
A	I	S	R	K	J	S
31				1	2	
3	4	5	6	7	8	9
10	11	12	13	14	15	16
17	18	19	20	21	22	23
24	25	26	27	28	29	30

* 12 - Awal Ramadan
28 - Hari Nuzul al-Quran

APRIL						
A	I	S	R	K	J	S
7	8	9	10	11	12	13
14	15	16	17	18	19	20
21	22	23	24	25	26	27
28	29	30				

* 10 & 11 - Hari Raya Puasa



Ekonomi makin pulih

Oleh FARIDZWAN ABDUL GHAFAR

Permintaan domestik dan perbelanjaan isi rumah memacu pertumbuhan ekonomi negara tahun ini. Perbelanjaan isi rumah disokong peningkatan gaji dan peluang pekerjaan.

Dua faktor berkenaan mendorong ekonomi berkembang mengikut unjuran sekitar empat peratus.

Keluaran Dalam Negara Kasar (KDNK) suku ketiga 2023 mencatat pertumbuhan sebanyak 3.3 peratus berbanding 2.9 peratus pada suku kedua 2023.

Kenyataan Bank Negara pada 17 November menyebut, pelaburan disokong pelaksanaan projek dan pengembangan sektor swasta.

Eksport perlahan lantaran pengurangan permintaan dari luar, namun diatasi menerusi pemulihan industri pelancongan.

Sektor perkhidmatan, pembinaan dan pertanian terus bertumbuh, kecuali pembuatan merosot kerana permintaan produk elektrik dan elektronik menyusut selain pengeluaran rendah produk hiliran petroleum.

Antara Januari hingga November, perdagangan susut 7.5 peratus kepada RM2.413 trillion berbanding tempoh sama tahun lalu apabila eksport kurang 7.8 peratus kepada RM1.308 trillion. Import turun 7.1 peratus kepada RM1.105 trillion dan lebih dagangan merosot 11.3 peratus kepada RM202.49 bilion.

Prestasi berkenaan seiring rakan dagang utama lain seperti Taiwan, China dan Indonesia yang merekodkan pertumbuhan perdagangan negatif pada November 2023 serta pengurangan import global.

Perdana menteri dalam belanjawan persekutuan 2024 pada 29 November berkata pengurusan ekonomi negara baik dengan petunjuk ekonomi positif.

Tahap pengangguran diturunkan 3.4 peratus setakat September 2023, iaitu terendah hampir menyamai kadar sebelum Covid-19 iaitu 3.3 peratus.

Anwar yang juga menteri kewangan berkata kerajaan meraih komitmen pelaburan bernilai RM347 bilion.

Ia diperoleh melalui lawatan ke negara seperti China, Singapura, Jepun, Korea Selatan, Emiriah Arab Bersatu, Arab Saudi dan Amerika Syarikat.

Bagi separuh pertama 2023, kerajaan meluluskan pelaburan bernilai RM132.6 bilion iaitu

melebihi 60 peratus daripada sasaran tahun ini.

Tekanan inflasi terkawal daripada empat peratus tahun lalu, kini setakat Oktober 2023, kadar inflasi hanya 1.8 peratus. Inflasi produk makanan dan minyak terus menurun.

Prestasi ringgit

Sektor perkhidmatan terpilih termasuk penghantaran makanan dari rumah, perbelanjaan di restoran dan kafe dan pemberian dan penyenggaraan kenderaan menyumbang paras inflasi sederhana.

Timbalan Menteri Kewangan I Datuk Seri Ahmad Maslan pada 23 Oktober di Parlimen berkata, inflasi semakin menurun sekali gus kenaikan kadar dasar semalam (OPR) tidak lagi relevan.

Ringgit berada paras terendah sejak Krisis Kewangan Asia pada 19 September. Mata wang tempatan pada paras RM4.7635 berbanding 1 dolar Amerika Syarikat (AS), paling lemah sejak 1998.

Tidak mencerminkan asas ekonomi negara, nilai ringgit tidak menentu disebabkan faktor luaran termasuk ketegangan di Asia Barat yang mempengaruhi prestasi mata wang serantau.

Ahmad dipetik berkata faktor lain mendorong penurunan nilai ringgit tahun ini ialah jangkaan Kadar Dana Persekutuan (FFR) AS akan kekal lebih tinggi untuk tempoh lebih lama.

Rizab Persekutuan (Fed) AS berusaha mengawal inflasi pada kadar 3.7 peratus, sudah menaikkan FFR kepada 5.5 peratus. OPR Malaysia pada kadar tiga peratus.

Pada masa sama, Bank Rakyat China melonggar dasar monetari untuk mengatasi kelembapan ekonomi negara berkenaan yang menjelaskan sentimen pelabur.

Ringgit menyusut 0.2 peratus berbanding dolar AS. Penyusutan turut dialami mata wang serantau berbanding mata wang utama dunia itu.


Bagaimanapun, ringgit meningkat 1.4 peratus berbanding mata wang utama lain.

Pasaran ekuiti tempatan terjejas oleh cabaran luaran dalam tempoh lapan bulan pertama 2023.

Pada akhir Disember 2022 sehingga 14 Mac, Indeks Komposit Kuala Lumpur FTSE Bursa Malaysia (FBM KLCI) menyusut 6.8 peratus dan ditutup pada 1,393.83 mata iaitu di bawah paras psikologi 1,400 mata.

Pada Mei, kenaikan kadar OPR, kebimbangan krisis perbankan

Prestasi Bursa Malaysia 2019-2023



¹ Akhir-Ogos 2023

² Akhir tempoh

Sumber: Bursa Malaysia

AS, rundingan siling hutang AS dan pilihan raya enam negeri menyebabkan pelabur defensif dan meningkatkan aktiviti pengambilan untung.

Sentimen baik

Aktiviti ekonomi perlahan di Eropah dan pendapatan korporat domestik lemah menambahkan kebimbangan. Akibatnya, FBM KLCI ditutup rendah pada paras 1,387.12 mata pada akhir Mei.

Berkuat kuasa 13 Julai, kerajaan mengurangkan duti setem saham didagangkan di Bursa Malaysia daripada 0.15 peratus kepada 0.10 peratus bagi merancakkan pasaran modal domestik.

Sehubungan itu, FBM KLCI pulih dan ditutup tinggi pada 1,459.43 mata pada akhir Julai. Ia dirangsang minat pembelian asing kukuh dan sokongan institusi tempatan serta peningkatan aktiviti memburu saham murah.

Sentimen pasaran semakin baik, menyokong peningkatan indeks kepada 1,462.03 mata pada 9 Ogos.

Naib Presiden Penyelidikan Ekuiti Rakuten Trade, Thong Pak Leng, dilapor berkata pada 19 Disember paras 1,465 mata menjadi paras

halangan kukuh.

Beliau menjangkakan jika paras itu dilepasi, indeks Bursa Malaysia kemungkinan mencabar paras 1,500 mata.

Gabenor Bank Negara Datuk Abdul Rasheed Ghaffour menjangkakan ekonomi Malaysia berkembang sekitar empat hingga lima peratus pada 2024.

Pertumbuhan ekonomi terus didukung permintaan domestik di samping pertumbuhan peluang pekerjaan dan pendapatan, khususnya dalam negara.

Prestasi pertumbuhan sejajar pembangunan ekonomi akan menyokong prestasi ringgit. Peningkatan kedatangan dan perbelanjaan pelancong juga dijangka meningkat.

Pelaburan akan disokong pencapaian penyiapan projek infrastruktur dan pelaksanaan inisiatif pemangkin.

Langkah-langkah digariskan belanjawan persekutuan 2024 juga memberi kesan positif aktiviti ekonomi. Antaranya Pelan Induk Perindustrian Baharu 2030 (NIMP 2030) dengan tumpuan sektor pertumbuhan bernilai tinggi serta dijangka memulihkan eksport.

Kuasai pentas dunia

Oleh NADIAH ZAMLUS

Harimau Malaya pasukan ketiga di dunia paling tinggi melonjak kedudukan (ranking) Persekutuan Bolasepak Dunia (FIFA) sepanjang tahun ini, di belakang Panama dan Moldova.

Skuad kendalian Kim Pan Gon melangkah 15 anak tangga untuk berada kedudukan ke-130, peningkatan tertinggi dalam kalangan negara Asia.

Prestasi Malaysia sebelum ini suram terutama 2018 apabila merekod kedudukan ke-187, terendah dalam sejarah. Pencapaian terbaik tempat ke-75 pada 1993.

Skuad negara juga memamer aksi memukau dalam kelayakan Piala Dunia 2026/Piala Asia 2027 pada November. Memungut mata maksimum dalam pusingan pertama, mereka menewaskan Kyrgyzstan meski ketinggalan dua gol.

Rata-rata peminat teruja, bahkan ada mula mencongak peluang untuk layak ke kejohanan paling berprestij itu meski perjalanan masih jauh.

Malaysia berpeluang ke pusingan ketiga menempatkan gergasi Asia termasuk Jepun dan Korea Selatan jika menjadi dua pasukan teratas pusingan kedua. Lapan slot automatik disediakan untuk Asia.

Dalam Sukan Asia di Hangzhou, China pada September, jaguh ekuestrian Mohd Qabil Ambak Mahamad Fathil menamat penantian 25 tahun apabila meraih emas acara dressage individu, pertama kali dimenangi negara sejak acara itu diperkenal pada 1986.

Atlet berusia 43 tahun yang berkecimpung selama 28 tahun menyumbang satu emas, tiga perak dan empat gangsa sepanjang penyertaannya dalam temasya sama.

Olahraga cemerlang

Olahraga juga menyaksikan kecemerlangan atlet pada pentas dunia khususnya Shereen Samson Vallabou yang meraih gangsa acara 400 meter (m) dalam Sukan Asia di Hangzhou, China.

Kejayaan tersebut mengulangi pencapaian



ibunya Josephine Mary pada 1986 sekali gus mengakhiri kemarau pingat acara itu selama 17 tahun.

Shereen, 25, juga memadam rekod kebangsaan milik G Shanti sejak 1998 dalam acara 200m selain mengatasi catatan berusia 30 tahun milik Rabia Abdul Salam dalam acara 400m.

Beliau juga memecahkan rekod 400m dalam dewan ketika memenangi emas Kejohanan Trek dan Balapan Dalam Dewan Divisyen II Persatuan Olahraga Kolej Kebangsaan di Virginia, Amerika Syarikat.

Dalam sukan berbasikal, Malaysia meraih empat emas dalam Piala Berbasikal Trek Antarabangsa Hong Kong pada Mei. Selain Datuk Azizulhasni Awang yang mengungguli acara pecut dan keirin, pelumba muda Nurul Izzah Izzati Mohd Asri turut menuai emas dalam acara pecut.

Sebulan sebelumnya, gadis kelahiran Jitra, Kedah itu memecahkan rekod kebangsaan acara sama dalam pusingan kelayakan Kejohanan Piala Negara-Negara Kesatuan Berbasikal Antarabangsa di Kanada.

Selain memadam catatan rakan sepasukan Anis Amira Rosdi itu, Nurul Izzah Izzati juga memecah rekod kebangsaan milik ratu trek negara Fatehah Mustapa dalam Kejohanan Berbasikal Trek Asia pada Jun.

Muhammad Fadhil Mohd Zonis, Muhammad



Ridwan Sahrom dan Umar Hasbullah pula menang gangsa acara pecut berpasukan di Sukan Asia, Hangzhou.

Tidak ketinggalan, Natasha Roslan menjuarai Kejohanan Tenpin Boling Dunia di Kuwait pada Oktober. Beliau anak Malaysia ketiga merangkul gelaran itu selepas Esther Cheah di Aalborg, Denmark pada 2005 dan Jacqueline Sijore di Hong Kong (2011).

Dalam sukan muay thai, nama petarung muda Johan 'Jojo' Ghazali kian meniti di bibir peminat apabila menumbangkan Edgar Tabares dalam masa 36 saat menerusi pukulan 'knockout'.

Berusia 17 tahun, beliau menumpaskan juara Muay Thai Antarabangsa WBC itu ketika penampilan sulungnya di Primetime US, ONE Championship pada 9 Disember.

Atlet sukan para juga tidak kurang hebatnya. Mereka mengharumkan nama Malaysia apabila meraih tujuh emas, perak 15 dan gangsa 17 dalam temasya Sukan Para Asia di Hangzhou sekali gus melepas sasaran 35 pingat.

Mereka juga mencatat beberapa rekod baharu kejohanan antaranya powerlifting. Jaguh negara Bonnie Bunyau Gustin angkatan 230 kilogram (kg) bagi acara 72kg sekali gus melebur rekod 229kg milik atlet Iran Roohallah Rostami.

Aras baharu filem

Oleh ABDUL RAHIM SABRI

Pencapaian industri filem negara tahun ini cukup membanggakan. Mutu pemain industri termasuk pelakon, genre filem dan kandungan layar dipersembah semakin baik berbanding tahun-tahun sebelumnya.

Menyifatkan tahun ini gelombang baharu filem Malaysia, Menteri Komunikasi Fahmi Fadzil berkata 30 tempatan ke pelbagai festival filem antarabangsa dan ada menempa kejayaan dalam kategori dipertanding.

Sebanyak 56 tempatan ditayangkan tahun ini dengan kutipan pecah panggung mencecah RM98.8 juta, beritahu Fahmi pada 20 Disember.

Tumpuan terbesar pastinya kejayaan anak Malaysia, Tan Sri Michelle Yeoh meraih Pelakon Wanita Terbaik dalam Anugerah Akademi ke-95.

Pelakon antarabangsa kelahiran Ipoh, Perak dinobatkan pelakon Asia pertama mendapat pengiktirafan itu menerusi watak Evelyn Quan Wang dalam filem 'Everything Everywhere All At Once'.

Filem ini mengisahkan Evelyn Wang, lakonan Yeoh, sedang bergelut menyelesaikan cukai ketika dia dihanyutkan ke alam semesta alternatif.

Filem Tiger Stripes arahan Amanda Nell Eu menang tiga anugerah antarabangsa, masing-masing satu di Minggu Kritik Festival Filem Cannes ke-62, filem cereka



terbaik di Festival Filem Fantastik Antarabangsa Neuchatel ke-22 dan menang anugerah khas penghargaan juri di Festival Filem Antarabangsa Fantasia ke-27.

'Tiger Stripes' mengisahkan perjalanan gadis 12 tahun, Zaffan, yang bersikap aneh ketika berdepan usia akil baligh. Dia bergelut dengan perubahan fizikal diri sehingga dipulau masyarakat. Berani melawan rasa takutnya, Zaffan muncul menjadi wanita kuat.

Filem itu akan mewakili Malaysia untuk Anugerah Akademi ke-96 bagi kategori Filem Cereka Antarabangsa Terbaik yang dijangka berlangsung pada Mac 2024.

Satu lagi karya mengharumkan nama negara ialah filem Abang Adik arahan Jin Ong. Ia mendapat enam anugerah iaitu tiga di Festival Filem Timur Jauh di Itali, dua di Film De Bourg, di Perancis dan dinobat filem cereka terbaik pada Festival Filem Asia New York ke-22.

Melengkapkan kecemerlangan filem Malaysia, Dain Said yang mengarah filem Harum Malam yang ditayangkan Februari tahun ini, mendapat pengiktirafan pengarah terbaik dalam Festival Filem Antarabangsa Horroant kelapan di Greece.

Filem Imaginur mendapat pujian pengkritik dan penggiat filem tempatan. Dianggap filem terbaik tahun ini, karya sains fiksyen pengarah muda Nik Amir Mustapha menggabungkan tema cinta dan kekeluargaan dengan elemen hipnosis. Sekali gus menjadikan naratif cerita lebih berkesan dan menarik.

Imaginur mengisahkan Zuhal, bermimpi seorang gadis dikenali Nur. Kemudian melalui proses hipnosis, dia

tiba-tiba dapat berjumpa wanita itu di alam realiti, menyebabkan keadaan mula berubah.

Semasa Zuhal cuba mengenal pasti wanita misteri itu, dia mula jatuh cinta dan belajar mengenali diri sendiri.

"Saya ulang: Filem terbaik Malaysia yang saya tonton tahun ini" puji Pengarah Urusan Kuman Pictures Amir Muhammad pada 21 Februari terhadap Nik Amir yang juga mengarah filem KIL dan Terbaik dari Langit.

Buat julung kali, kisah perdana menteri difilem dan ditayangkan. Biopik Anwar: The Untold Story arahan pengarah Indonesia Viva Westi mengisahkan perjuangan Datuk Seri Anwar Ibrahim dari zaman muda hingga pemecatannya sebagai timbalan perdana menteri pada 1998.

Filem Imam hasil adaptasi karya Sasterawan Negara Datuk Abdullah Hussain dengan tajuk sama, turut mewarnai industri filem negara. Namun buah tangan Mior Hashim Manap ini dilihat kurang mendapat reaksi positif walau berusaha mengadaptasinya.

Tahun ini juga menyaksikan semakin banyak penghasilan filem genre patriotik seperti Malbatt: Misi Bakara arahan Adrian Teh. Ia menceritakan perjuangan anggota Rejimen Askar Melayu Diraja dalam misi menyelamat tentera elit Amerika Syarikat yang diserang di Pasar Bakara

di Mogadishu, Somalia.

Selain itu, Coast Guard Malaysia: Ops Helang yang diarahkan oleh Pit Haniff ditayangkan pada Ogos. Filem itu turut ditayang dalam Festival Filem Far East, Udine, Itali pada 21 April. Ia mengisahkan kehidupan pegawai Pasukan Tindakan Khas dan Penyelamat Maritim yang mahu memulakan kehidupan baharu di sebuah pulau.

Pada hari pertunungan, dia, tunang, ibu bapa dan beberapa tetamu diculik sekumpulan penjenayah lalu mendorong satu operasi digerakkan untuk menumpas penjenayah terbabit.





SABAR... Kakitangan Hospital Hulu Terengganu menaiki jengkaut untuk pulang ke rumah selepas laluan utama Ajil-Kuala Berang terputus kira-kira 400 meter berikutan banjir pada 27 Disember. Foto BERNAMA

Pentadbir IPT perlu main peranan

Fahaman taasub undang perpecahan

Oleh SITI ROHAIZAH ZAINAL

MUALLIM - Perdana menteri bimbang fahaman taasub dalam kalangan anak muda khususnya di institusi pengajian tinggi (IPT) semakin menular.

Justeru, Datuk Seri Anwar Ibrahim meminta pihak universiti memainkan peranan sewajarnya bagi mengelak berlakunya perpecahan dalam kalangan masyarakat dan kaum.

"Saya bimbang penularan ketasuban menggilir...cerita perkauman, Melayu sudah habis, Pulau Pinang

dikristiankan, Anwar gadai dan khianat orang Melayu. Hal-hal ini yang harus dikawal... kalau bertanya cara baik tidak mengapa, ini kalau terikut pemimpin 'desperate' kita akan rugi."

"Kalau benar, tidak mengapa... umpamanya sejak Anwar jadi PM, Islam hanyut, hilang. Sedangkan program Islam lebih mantap dan peruntukan juga lebih tinggi."

"Saya tidak boleh izinkan perkara ini, minta naib canselor, universiti kawal. Bukan takut fahaman politik mereka, jumlahnya kecil, tetapi mahu selamatkan negara kerana ini akan memecah-

belahkan negara," katanya.

Beliau menghadiri sesi Dialog Mahasiswa Temu Anwar di Dewan Tuanku Canselor Universiti Pendidikan Sultan Idris (UPSI) di sini pada 21 Disember.

Pada masa sama, Anwar menegaskan tidak akan membenarkan mana-mana pihak untuk masuk ke institusi pengajian tinggi semata-mata mahu menanam fahaman kebencian kaum.

"Kalau mereka nak beri pandangan terbuka saya tidak peduli, tetapi kalau nak bawa pandangan tanam kebencian kaum, semuanya menjadi musuh, saya tidak izinkan," katanya.

Mangsa banjir terus meningkat

SHAH ALAM - Jumlah mangsa dipindahkan di enam negeri yang terjejas banjir terus meningkat kepada 28,310 orang setakat 6 pagi pada 27 Disember berbanding 25,938 orang dengan Johor dan Sabah menjadi negeri terbaharu dilanda bencana itu.

Kelantan kekal dengan jumlah mangsa tertinggi sebanyak 17,466 orang yang dipindahkan ke 89 PPS, meningkat dari 15,145 orang di

92 PPS, lapor Bernama.

Di Terengganu pula, jumlah mangsa sedikit menurun kepada 10,103 orang yang berlindung di 113 PPS berbanding 10,199 orang di 125 PPS sehari sebelumnya, begitu juga di Pahang yang merekodkan seramai 485 mangsa di sembilan PPS berbanding 590 mangsa di 13 PPS.

Selangor kekal dengan empat mangsa yang ditempatkan di PPS daerah Kuala Langat, manakala dua negeri ter-

bahru dilanda banjir, Sabah dan Johor masing-masing merekodkan seramai 169 mangsa di tiga PPS dan 83 orang di sebuah PPS.

Laporan itu turut memaklumkan daripada sembilan PPS yang masih dibuka di Pahang, satu daripadanya iaitu di daerah Cameron Highlands yang melibatkan kejadian tanah runtuh, kekal menempatkan 87 mangsa dari 17 keluarga.

RM25 juta tambah kolej kediaman

MUALLIM - Sejumlah RM25 juta diluluskan untuk membina 18 blok tambahan kolej kediaman mahasiswa Universiti Pendidikan Sultan Idris (UPSI).

Perdana Menteri Datuk Seri Anwar Ibrahim berkata kolej kediaman yang ada sekarang hanya mampu menampung 7,804 atau 36 peratus daripada lebih 31,000 pelajar.

"Ini kadar terendah berbanding institusi pengajian tinggi awam lain 60 peratus."

"Kita ambil langkah tambah kapasiti kolej kediaman, belanjanya saya luluskan RM25 juta," katanya dalam Dialog Mahasiswa Temu Anwar di sini pada 21 Disember.

Tambang percuma OKU mulai Februari

SHAH ALAM - Semua pemegang kad Orang Kurang Upaya (OKU) bakal menikmati tambang percuma bagi semua perkhidmatan kenderaan awam kendalian Prasarana Malaysia Berhad (Prasarana) mulai 1 Februari 2024.

Menteri Pengangkutan Anthony Loke berkata pengguna hanya perlu mengeluarkan kad OKU Jabatan Kebajikan Masyarakat untuk menikmati inisiatif berkenaan di sekitar Lembah Klang.

Katanya, Prasarana diberi tempoh sebulan untuk melakukan persiapan dan menyerap sistem tiket termasuk pemberian kad konsesi khas kepada pengguna OKU.

"Prasarana bersetuju untuk memberikan tambang percuma kepada OKU, walaupun memberi dampak kewangan kepada Prasarana. Kemudahan ini sebahagian daripada tanggungjawab sosial korporat mereka," katanya pada 21 Disember.

Inisiatif itu adalah penambahbaikan pas konsesi sebelum ini yang menawarkan diskon 50 peratus tambang perjalanan untuk OKU.

Skim Perkeso untuk pekerja filem

SHAH ALAM - Skim Pertubuhan Keselamatan Sosial (Perkeso) untuk pekerja dalam sektor perfilman termasuk bekerja bebas (freelancer) akan diwujudkan untuk memastikan mereka mendapat perlindungan keselamatan sosial termasuk pencegahan.

Menteri Komunikasi Fahmi Fadil berkata langkah itu membolehkan penggiat industri mempunyai perlindungan mencukupi.

Justeru, beliau meminta Perbadanan Kemajuan Filem Nasional Malaysia (FINAS) mengadakan perbincangan dengan Perkeso bagi membolehkan skim berkenaan dilaksanakan segera.

"Bagi pelakon dan kru, tangan mereka, kaki mereka dan tubuh badan adalah 'peralatan' mereka untuk bekerja. Kalau ada berlaku apa-apa maka kesannya adalah seumur hidup," katanya seperti dilapor Bernama pada 20 Disember.

Proses daftar MyDigital ID lancar

SHAH ALAM - Proses pendaftaran Identiti Digital Nasional atau MyDigital ID membabitkan 1.6 juta penjawat awam yang sedang giat dilaksanakan ketika ini berjalan dengan baik, kata menteri komunikasi.

Fahmi Fadzil berkata fokus ketika ini menjayakan pendaftaran untuk kakitangan kerajaan sebelum dibuka kepada umum pada Mac tahun depan, lapor Bernama.

"Harapan saya, kita akan dapat pertingkatkan pendaftaran bagi sistem MyDigital ID yang merupakan single sign on (SSO) sistem ataupun sistem yang kita cuma buat pendaftaran sekali sahaja," katanya pada 21 Disember.

MyDigital ID adalah satu bentuk pengenalan dan pengesahan diri individu secara digital untuk mengesahkan identiti pengguna semasa melakukan transaksi dalam talian.

Empat premis gagal patuh arahan KPDN

SHAH ALAM - Hanya empat daripada 1,091 premis di Selangor dikenakan tindakan sepanjang pemeriksaan Skim Harga Maksimum Musim Perayaan (SHMMP) tahun ini, kata ketua pegawai penguat kuasa Kementerian Perdagangan Dalam Negeri dan Kos Sarawak Hidup (KPDN) negeri.

Mohd Khairi Jamaludin berkata ia menunjukkan kadar pematuhan tinggi peniaga di negeri ini terhadap peraturan ditetapkan ketika perayaan Tahun Baharu Cina, Aidilfitri dan Deepavali lalu.

"KPDN Selangor yakin prestasi pematuhan peniaga sepanjang SHMMP sempena Krismas yang berkuat kuasa 23 Disember hingga 27 Disember ini juga berupaya mencapai sifar kesalahan," katanya seperti dilapor Bernama pada 23 Disember.

Henti operasi ladang 14 hari

SHAH ALAM - Pemilik sebuah ladang ternakan di Jeram, Kuala Selangor diarah menghentikan operasi selama 14 hari kerana pencemaran bau yang mengganggu penduduk setempat.

Yang Dipertua Majlis Perbandaran Kuala Selangor Mohamad Hanafe Basri berkata walaupun penternakan dijalankan di tanah persendirian, namun ia tetap menyebabkan bau busuk.

"Hasil pemantauan di ladang berhadapan Klinik Kesihatan Jeram itu mendapati ada bau kurang menyenangkan yang menyebabkan kacau ganggu daripada aktiviti penternakan kambing dan lembu."

"Sehubungan itu, Jabatan Kesihatan dan Persekitaran memberikan Notis Menghendaki Kacau Ganggu Bau Dihapuskan, manakala Jabatan Pengurusan juga memberikan Notis Menghentikan Aktiviti Penternakan dalam tempoh 14 hari," katanya dalam kenyataan pada 26 Disember.

Umum dividen ASB 5.25 sen seunit

SHAH ALAM - Amanah Saham Nasional Bhd (ASNB) mengisyiharkan jumlah agihan pendapatan sebanyak 5.25 sen seunit untuk dana perdananya Amanah Saham Bumiputera (ASB) bagi tahun kewangan berakhir 31 Disember 2023.

Syarikat pengurusan unit amanah milik penuh Permodalan Nasional Bhd (PNB) memaklumkan jumlah agihan tersebut terdiri daripada agihan pendapatan 4.25 sen seunit dan bonus 1.00 sen seunit.

Jumlah pembayaran itu berjumlah RM9.3 bilion dan akan memanfaatkan 10.8 juta pemegang unit ASB, lapor Bernama.

Sementara itu, Pengurus Kumpulan PNB Raja Tan Sri Arshad Raja Tun Uda berkata ASB terus memberikan pulangan yang mampan dan berdaya saing, mengatasi penanda aras kadar Deposit Tetap 12 bulan Maybank.

Menurutnya bilangan akaun ASB meningkat lebih 200,000 kepada 10.8 juta

akaun pada 2023, menunjukkan keyakinan berterusan terhadap ASB sebagai alat simpanan dan pelaburan penting untuk Bumiputera dalam perancangan kewangan mereka.

"Walaupun keadaan pasaran yang tidak menentu, PNB secara konsisten memberikan pulangan kompetitif melalui dana harga tetap kami, yang kesemuanya telah mengatasi penanda aras mereka selama ini."

Anak syarikat negeri nyatakan minat

Teroka pelaburan di Nusantara

SHAH ALAM - Beberapa syarikat milik Kerajaan Negeri menunjukkan minat tinggi untuk melabur dalam pembangunan ibu kota baharu Indonesia, Nusantara, menurut agensi penggalak pelaburan Invest Selangor.

Ketua Pegawai Eksekutif Datuk Hasan Azhari Idris berkata syarikat-syarikat ini terlibat dalam pelbagai sektor termasuk pembinaan kediaman, perkhidmatan kesihatan, tenaga boleh diperbaharui dan pengurusan sisa.

"Kami berminat dengan kerjasama pembangunan yang berpotensi daripada peringkat awal projek

ini dan dalam menyediakan kemahiran dan kepakaran," katanya seperti dilapor Bernama pada 21 Disember.

Invest Selangor menyertai misi pecutan eksport diketuai Perbadanan Pembangunan Perdagangan Luar Malaysia ke Indonesia pada 19 hingga 22 Disember.

Menurut Hasan Azhari, agensi itu akan berhubung rapat dengan Pihak Berkuasa Bandar Raya Nusantara (OIKN) dan terbuka kepada kemungkinan mengemukakan surat hasrat.

"Selepas pulang ke Malaysia, kami akan merancang untuk penglibatan

Selangor dalam pembangunan Nusantara," katanya.

Sementara itu, Ketua Pegawai Eksekutif Kumpulan Worldwide Holdings Bhd Datin Paduka Norazlina Zakaria turut menyatakan minat untuk meneroka pelaburan dalam sektor hartanah, tenaga hijau dan produk perubatan yang disahkan halal.

Setiausaha Kerajaan Negeri Dato' Setia Haris Kasim pula berharap Selangor dapat menyertai program pembangunan Nusantara dengan bekerjasama dengan kementerian, agensi dan syarikat kerajaan Indonesia.

"Ini adalah satu inisiatif untuk mengukuhkan hubungan dua hala untuk jangka masa panjang," tambahnya.



Kes Covid-19 naik 29.5 peratus

SHAH ALAM - Kes Covid-19 bagi Minggu Epidemiologi ke-51 (ME51) iaitu bagi tempoh 17 hingga 22 Disember meningkat kepada 22,413 kes berbanding 17,307 kes pada minggu sebelumnya.

Menteri Kesihatan Datuk Seri Dr Dzulkefly Ahmad berkata peningkatan dicatatkan sebanyak 29.5 peratus.

"Pada tempoh sama juga, jumlah kes

kematian Covid-19 dilaporkan berkurangan 23.1 peratus iaitu daripada 26 kepada 20 kes kematian," katanya menerusi kenyataan pada 23 Disember.

Dr Dzulkefly berkata secara keseluruhan jumlah kemasukan pesakit Covid-19 ke fasiliti kesihatan pada ME50 turut meningkat 1.5 peratus bagi pengisian katil bukan kritikal dan 3.6 peratus untuk pengisian katil Unit Rawatan Rapi.

Beliau berkata hanya 50 orang menerima dos penggalak pertama manakala 120 orang menerima dos penggalak kedua pada 22 Disember.

Sehingga 22 Disember hanya 16,347,130 penduduk Malaysia (50.1 peratus) telah menerima dos penggalak pertama dan hanya 828,686 penduduk Malaysia (2.5 peratus) menerima dos penggalak kedua.

Proses ambil tanah berperingkat

SHAH ALAM - MRT Corp akan memulakan proses pengambilan tanah secara berperingkat mulai 2024 bagi Projek Laluan Lingkaran Transit Aliran Massa 3 (MRT3) yang dijangka mengambil masa dua tahun untuk dimuktamad.

Menteri Pengangkutan Anthony Loke berkata bagi meminimumkan kos pengambilan tanah kepada kerajaan, MRT Corp secara aktif bekerjasama dengan pemaju untuk menyepakup

stesen MRT3.

"Di sini saya ingin memaklumkan bahawa kerajaan telah meluluskan peruntukan bagi proses pengambilan tanah jajaran bagi projek MRT3."

"Pendekatan kami terhadap proses pengambilalihan tanah akan menggabungkan langkah yang berhemah dan penuh ihsan untuk memastikan kesan sosial minimum kepada masyarakat," katanya lapor Bernama.

Sebelum itu beliau Majlis Menangani Perjanjian Pajakan antara MRT Corp dan Pesuruhjaya Tanah Persekutuan (PTP) di Putrajaya pada 21 Disember.

Tanpa memperinci jumlah peruntukan bagi tujuan itu, Loke berkata proses pengambilalihan dijangka membabitkan 1,012 lot meliputi tanah persendirian (842 lot), tanah kerajaan (133) dan tanah tidak diketahui (37).



BENTENG... Kontraktor giat melakukan kerja baik pulih tanah runtuhan yang merosakkan sembilan kediaman di Taman Wawasan, Subang Jaya pada 19 Disember. Foto Majlis Bandaraya Subang Jaya

Lunas tunggakan elak sita harta

Raih RM100.35 juta cukai taksiran

Oleh FITRI HAZIM HAZAM

GOMBAK - Sejumlah RM100.35 juta cukai taksiran semasa dikutip Majlis Perbandaran Selayang (MPS) setakat 30 November.

Yang Dipertua Dato' Mohd Yazid Sairi berkata jumlah itu merangkumi 87.43 peratus daripada sasaran RM114.78 juta tahun ini.

"Kutipan tunggakan cukai taksiran pula sebanyak RM8.96 juta atau 74.67 peratus berjaya diperoleh daripada jumlah keseluruhan tunggakan sebanyak

RM12 juta," katanya pada 21 Disember.

Beliau berkata kempen bayaran cukai taksiran secara dalam talian menerusi aplikasi MyMPS, Lazada, Shopee dan Cepat diteruskan.

Sementara itu, Mohd Yazid turut memaklumkan MPS mengeluarkan 31,303 waran kepada pemilik harta yang gagal membayar cukai taksiran sehingga 30 November lepas.

Menurutnya, harta pemilik yang mempunyai tunggakan RM200 ke atas bakal disita selepas tujuh hari waran diserahkan kecuali jika menyelesaikan bayaran penuh.

"MPS laksana tindakan waran tahanan sebanyak RM100 setelah notis caj lewat pada 15 Oktober lalu.

"Setakat ini 13,340 waran telah diserahkan kepada pemilik sementara bakinya akan dibuat sebelum 31 Disember ini," katanya yang turut mengingatkan orang ramai untuk menjelaskan tunggakan cukai.

Beliau menambah MPS sudah mengeluarkan bil awal cukai taksiran bagi penggal Januari 2024 dan orang ramai yang membuat pembayaran terawal akan menerima cenderahati payung.

Kutipan hasil MBSA lepasi sasaran

SHAH ALAM - Majlis Bandaraya Shah Alam (MBSA) berjaya mengutip cukai taksiran semasa sebanyak RM335 juta setakat awal Disember ini, maklum pemangku datuk bandar.

Cheremi Tarman berkata kutipan itu melebihi 100.01 peratus daripada sasaran RM296 juta untuk tahun ini.

"Kutipan tunggakan cukai taksiran pula sebanyak RM67.8 juta atau 55 peratus berbanding sasaran jumlah keseluruhan tunggakan iaitu seba-

nyak RM40.6 juta," katanya pada 22 Disember.

Cheremi menjelaskan pihaknya akan mempergiat sekatan urus niaga dan tindakan mahkamah (i-Sekat) tahun depan terhadap individu atau syarikat yang mempunyai tunggakan.

"Sehingga kini kita berjaya mengutip RM52 juta sejak i-Sekat dilaksana pada 2017.

"Tunggakan ini meliputi kompaun tempat letak kenderaan, cukai taksiran,

lesen, sewa, bil elektrik dan kos pembersihan lot kosong," katanya.

Sementara itu, Cheremi turut berkongsi kejayaan MBSA merangkul 27 anugerah termasuk Anugerah Khas bagi kategori PBT paling aktif melaksanakan inisiatif rendah karbon.

"Anugerah ini diterima menerusi Majlis Anugerah Bandar Rendah Karbon 2022 anjuran Malaysian Green Technology and Climate Change Corporation baru-baru ini," katanya.

Catat RM1.9 juta lesen perniagaan

GOMBAK - Majlis Perbandaran Selayang (MPS) mengutip bayaran lesen perniagaan berjumlah RM1.979 juta menerusi transaksi dalam talian setakat November.

Yang dipertuanya berkata lebih 2,339 transaksi direkod manakala bayaran lain dan sewa gerai sebanyak RM288,668.50.

"Kutipan permit bangunan dan perancang sebanyak RM23,145.60. Kutipan membabitkan kompaun untuk pelbagai jenis kesalahan sejumlah RM42,925.00.

"Selain itu, portal MyMPS juga dinaik taraf bagi kemudahan peniaga membuat bayaran bagi empat kategori yang berkaitan," kata Dato' Mohd Yazid Sairi pada 21 Disember.

Katanya MPS giat membuat kempen bayaran cukai taksiran secara dalam talian menerusi MyMPS, Lazada, Shopee dan Citizen E-Payment (CEPat) melalui mymps.mps.gov.my

Permit bazar dibuka Ramadan

SUBANG JAYA - Permohonan permit bazar Ramadan Majlis Bandaraya Subang Jaya (MBSJ) 2024 dibuka secara dalam talian sehingga 31 Disember.

Datuk Bandarnya Dato' Mohd Fauzi Mohd Yatim berkata sebanyak 25 lokasi bazar disediakan merangkumi 1,560 petak niaga boleh dimohon menerusi www.mbsj.gov.my atau imbas kod QR di poster yang dipaparkan di platform media sosial MBSJ.

"Peniaga yang berminat perlu mendaftar sebagai pengguna my@mbsj sebelum membuat permohonan permit bazar Ramadan dan urusan permohonan dilaksanakan sepenuhnya secara dalam talian mengikut tiga prosedur utama iaitu mendaftar, memuatnaik dokumen sokongan dan pembayaran permit," katanya pada 22 Disember.

Denda pengusaha gagal patuh syarat

SHAH ALAM - Majlis Daerah Sabak Bernam (MDSB) mengeluarkan 26 kompaun terhadap pengusaha di beberapa premis makanan atas pelbagai kesalahan dalam operasi pada 15 Disember.

Pihak berkuasa tempatan itu memaklumkan antara kesalahan dikesan adalah tidak memasang dan senggara perangkap minyak, tiada suntikan anti tifoid serta beroperasi tanpa lesen.

"Modus operandi digunakan adalah dengan menerjah gerai atau kedai, memeriksa pemasangan perangkap minyak dan penyelenggaraan seperti mana tertera dalam syarat pelesenan MDSB.

"Turut diperiksa kad suntikan anti tifoid semua pengendali makanan, sijil kursus pengendalian makanan termasuk lesen, longkang dan persekitaran premis," katanya menerusi Facebook.

Mais terbit buku penyelidikan

SHAH ALAM - Majlis Agama Islam Selangor (Mais) menerbitkan buku penyelidikan yang menghimpunkan enam kajian bagi isu hal ehwal Islam Selangor.

Pengerusinya Tan Sri Dato' Seri Abdul Aziz Mohd Yusof berkata penerbitan itu dihasilkan oleh penyelidik yang dilantik pihaknya dalam menyelesaikan isu umat Islam di negeri ini.

"Sejak 2019, sebanyak 26 kajian membabitkan penyelidik dari tujuh institusi pengajian tinggi seluruh negara dan enam kajian diterbitkan dalam buku penerbitan penyelidikan siri 1 Mais.

"Antaranya, fatwa hibah Selangor: penyelesaian isu-isu Fiqh dalam pelaksanaan hibah dan pelaksanaan pendidikan khas untuk murid berkeperluan khas di Sekolah Rendah Agama kelolaan Jabatan Agama Islam Selangor," katanya pada 20 Disember.

Agih RM160,132 fidyah empat daerah

SHAH ALAM - Sejumlah RM160,132 kutipan fidyah diagih Majlis Agama Islam Selangor (Mais) kepada 931 penerima di empat daerah.

Agenis itu memaklumkan agihan membabitkan 14 tempat sepanjang dua hari di daerah Petaling, Hulu Langat, Klang dan Gombak.

"Penerima dapat bantuan berupa set makanan kering seperti beras, minyak masak, bihun, gula, tepung gandum, kicap manis, susu pekat manis dan sardin," katanya menerusi Facebook pada 23 Disember.

Tambahnya agihan bersama rakan strategik fidyah Mais antaranya Masjid Bandar Utama Damansara, Pertubuhan Muallaf India Semalaysia dan Pusat Jagaan Mahmudah Malaysia.

Lanjut permohonan ke tingkatan satu

SHAH ALAM - Ibu bapa berpeluang memohon kemasukan pelajar tingkatan satu ke sekolah kendalian Jabatan Agama Islam Selangor (Jais) tahun hadapan sehingga 31 Disember.

Urusan itu membabitkan sekolah agama menengah (SAM), sekolah agama menengah tinggi (SAMT), sekolah menengah agama bestari (Sambest) dan maahad integrasi tafsir Selangor (Mits).

"Syarat kemasukan adalah ibu bapa warganegara Malaysia dan perlu memenuhi kelayakan akademik."

"Selain itu, pemohon pernah bersekolah di sekolah rendah agama Islam (SRAI), sekolah rendah agama (SRA), kelas al-Quran dan fardhu ain integrasi (KAFAI), sekolah rendah Islam (SRI) serta sekolah rendah Islam integrasi (SRII)."

Sebelum ini, permohonan kemasukan dibuka dari 7 hingga 22 Disember melalui pautan esekolah.jais.gov.my

RM40 juta laksana projek tebatan

SHAH ALAM - Majlis Bandaraya Shah Alam (MBSA) melaksanakan empat projek tebatan banjir dengan kos berjumlah RM41 juta, kata pemangku datuk bandar.

Cheremi Tarman berkata projek bermula Disember tahun lalu itu merangkumi baik pulih dan membina longkang, parit, rumah pam serta kolam takungan yang dilaksana berperingkat.

Menurutnya antara kawasan terlibat di Seksyen 13, Taman Sri Muda (Seksyen 25), Seksyen U1 dan Seksyen 7 yang juga merupakan lokasi kerap berlaku banjir.

"Projek itu dilaksanakan secara berperingkat sejak 2022 hingga sekarang dan proses tawaran juga dibuat secara tender terbuka."

"Insya-Allah, kita jangka projek fizikal siap April tahun hadapan manakala kajian perunding dibuat sehingga awal

2025," katanya pada 22 Disember.

Menurut Cheremi MBSA masih meneruskan kerja senggara dan pemantauan selama 24 jam menerusi pusat Integrasi Sistem Pemantauan Pintar Shah Alam (Iris).

"Jawatankuasa bencana juga ditubuhkan dan akan terus digerakkan sekiranya berlaku kecemasan dimana-mana kawasan di Shah Alam," katanya.

Zakat perniagaan penyumbang utama

Terima RM791 juta setakat November

SHAH ALAM - Lembaga Zakat Selangor (LZS) mengumpul sebanyak RM791 juta kutipan zakat setakat November membabitkan 328,000 pembayar individu dan syarikat korporat.

Ketua Pegawai Eksekutif Mohd Sabirin Mohd Sarbini berkata zakat perniagaan merupakan penyumbang utama dengan kutipan sebanyak RM116 juta, menghampiri jumlah RM167 juta yang disasarkan untuk 2023.

"Berdasarkan anggaran umum kami dan usaha yang telah dilaksanakan, kami sangat optimis untuk



mencapai sasaran itu dan akan teruskan usaha untuk melebihi sasaran," katanya seperti dilapor Bernama.

Beliau berkata pembayar zakat perniagaan antaranya peniaga kecil, syarikat milikan persendirian, syarikat sendirian berhad, anak syarikat berkaitan kerajaan malah peniaga dalam talian.

Sabirin berkata pada 2022, zakat perniagaan menyumbang sebanyak RM166 juta.

Sementara itu, LZS menerima zakat perniagaan daripada 35 syarikat berjumlah RM19,594 juta dalam Majlis

Iktiraf Muzakki dan Penyerahan Zakat 2023 yang disempurnakan Pengerusinya Tan Sri Syed Anwar Jamalullail pada 20 Disember.

Cyberview Sdn Bhd mendahului senarai penyerahan berjumlah RM3,194,730, diikuti Bank Kerjasama Rakyat Malaysia (RM2,680,968) dan CIMB Islamic Bank Berhad (RM1,500,000).

Pada majlis sama, LZS turut menyampaikan agihan zakat meliputi bantuan derma siswa pengajian tinggi, sumbangan pengimaranan, peralatan, bina atau baik pulih masjid dan surau serta sumbangan tabung kebajikan pesakit hospital sebanyak RM51.1 juta.

Bangun 10,000 hektar buat industri

KLANG - Majlis Perbandaran Klang (MPK) bercadang membangunkan 10,000 hektar tanah untuk kawasan industri bagi memenuhi permintaan tinggi pengusaha.

Yang Dipertua Datin Paduka Noraini Roslan berkata pendekatan itu juga bertujuan merancakkan ekonomi di daerah terbabit yang bakal berstatus bandar raya.

Beliau menjelaskan pihaknya membuat pindaan terhadap rancangan

tempatan bagi merealisasikan hasrat itu dan sedang menunggu kelulusan pentadbiran negeri.

"Kita memang menerima banyak permohonan supaya menambah kawasan industri. Insya-Allah kita akan dapat 10,000 hektar lagi kawasan industri pada masa akan datang."

"Itu (penambahan kawasan industri) daripada segi (pembangunan) ekonominya. Kita mahu ekonomi di Klang terus mampan," katanya pada 20

Disember.

Sementara itu, beliau turut menggalakkan pengusaha kecil tidak berlesen memutihkan status mereka supaya mampu menikmati kemajuan ekonomi berterusan.

"Jika dia (pengusaha kecil) mahu eksport barang kena ada sijil daripada pihak berkuasa tempatan dan dunia sekarang memerlukan pengiktirafan itu. Jadi saya sangat menggalakkan industri itu untuk ke depan," katanya.

Festira 2024 dianjur lebih meriah

SHAH ALAM - Festival Ramadan Selangor (Festira) pada tahun depan bakal dianjur lebih meriah dengan pertambahan bilangan usahawan dan jenis barang jualan.

Ketua pegawai eksekutif PKNS Real Estate Sdn Bhd (PREC) berkata acara tahunan itu menjadi tumpuan pengunjung dari serata negeri sekali gus menambah pendapatan peniaga. "Festira 2024 akan menarik penyer-

taan lebih ramai usahawan dengan pelbagai jenis jualan. Kita akan menambah pelbagai jualan lagi di sekitar SACC Walk daripada reruai makanan dan minuman, pakaian dan kebudayaan."

"PREC juga akan bekerjasama dengan pelbagai agensi untuk menganjurkan acara terutama di SACC Mall bagi menarik lebih ramai pengunjung," kata Fakru Radzi Ab Ghani

pada 20 Disember.

Festira tahun ini berlangsung pada 5 Mac sehingga 21 April menerima 2.5 juta pengunjung dengan penyertaan kira-kira 1,000 usahawan berbanding 700 pada tahun lalu.

Acara dengan tema 'Festira-Ya!' itu berlangsung selama 48 hari di Kompleks PKNS Shah Alam, Kompleks PKNS Bangi, dan di pusat beli-belah SACC.



SEMANGAT... Aksi penyerang Harimau Malaya Faisal Halim dan Safawi Rasid ketika latihan pusat bagi menghadapi Piala Asia 2023 di Petaling Jaya pada 26 Disember. Foto Persatuan Bolasepak Malaysia

Kejohanan perahu layargilap bakat

Tarik penyertaan atlet luar negara

Oleh FITRI HAZIM HAZAM

KUALA LANGAT - Atlet antarabangsa menyokong usaha Majlis Perbandaran Kuala Langat dan Persatuan Sukan Layar Selangor mengembangkan bakat muda melalui Kejohanan Perahu Layar Terbuka 2023 di Pantai Batu Laut.

Peserta dari India Shreya Krishna Lakshminarayanan, 17, berkata kejohanan ini memberi ruang buatnya meneroka pengalaman baharu dan mengasah kemahiran di tempat yang berbeza.

"Saya teruja datang bersama ibu bapa dari Chennai menyertai kejohanan ini

dan pengalaman berlayar dalam keadaan pelbagai cuaca memberi pelajaran baru buat saya sejak aktif dalam sukan ini sejak 2019.

"Kejayaan saya menang tiga kategori iaitu optimist wanita (naib johan), optimist division A (ketiga) dan kelima secara keseluruhan adalah pencapaian terbaik. Jika dianjurkan lagi tahun hadapan, pasti saya akan serta lagi," katanya pada 24 Disember.

Pelayar Indonesia, Astari Rahayu Kenes, 18, berkata kejohanan itu menyajikan pengalaman dan cabaran berbeza di laut buat bakat-bakat baharu.

"Melalui kejohanan ini, saya menjadi

juara RS One kategori wanita yang sudah semestinya membantu perkembangan kemahiran dalam sukan ini. Saya harap kejohanan diteruskan dengan menambah jumlah penyertaan di masa akan datang," katanya.

Sementara itu, yang dipertua MPKL berkata seramai 80 atlet dalam dan luar negara menyertai kejohanan bermula 22 hingga 24 Disember.

"Saya ucapkan tahniah kepada semua peserta yang telah menampilkan pelbagai aksi menarik dan bersungguh-sungguh dalam setiap acara yang dipertandingkan," kata Dato' Amirul Azizan Abd Rahim.

Liga Malaysia 2024 bermula 3 Mei

SHAH ALAM - Musim baharu Liga Malaysia (Liga-M) bagi 2024/2025 akan bermula pada 3 Mei dan dijadual berakhir April 2025.

Liga Bolasepak Malaysia (MFL) memaklumkan perubahan kalendar kejohanan yang lazimnya bermula Februari selari dengan transisi liga tempatan mengikut format Konfederasi Bolasepak Asia (AFC).

Menurut MFL, perubahan juga me-

ngambil kira beberapa faktor khususnya penglibatan pemain bersama skuad kebangsaan, skuad Bahaw 23 tahun (B-23) serta penyertaan kelab di Piala AFC 2023.

"Pemain-pemain Harimau Malaya akan melaporkan diri ke kem latihan pusat sebelum mengharungi Kejohanan Piala Asia 2023 di Doha, Qatar pada 12 Januari hingga 10 Februari 2024.

"Tugasan skuad Harimau Malaya akan

diteruskan dengan perlawanan Pusingan Kelayakan Piala Dunia 2026/Piala Asia 2027 menentang Oman pada 21 dan 26 Mac 2024," katanya dalam kenyataan pada 22 Disember.

Musim baharu Piala MFL bermula pada 13 Mei manakala tarikh pendaftaran pemain dalam jendela perpindahan Liga-M 2024/2025 mulai 3 Februari hingga 26 April depan.

Pan Gon terlepas tiga pemain

SHAH ALAM - Ketua jurulatih Harimau Malaya mengakui hasratnya untuk memanggil tiga pemain menyertai kem latihan pusat di Piala Asia 2023 yang bermula pada 26 Disember tidak kesampaian.

Menurut Kim Pan Gon, perancangan awal beliau memanggil Sharul Nazeem Zulpakar, Azam Azmi dan Feroz Baharudin.

"Saya gembira dengan pemilihan pemain kali ini walaupun tidak mendapat dua pemain iaitu Shahrul Nazeem Zulpakar dan Azam Azmi Murad kerana kecederaan.

"Kita juga menjemput Feroz Baharudin tetapi dia ada perancangan untuk berkahwin, jadi tahniah diucapkan kepada Feroz tetapi ini adalah skuad terbaik buat masa ini," katanya seperti dilapor Berita Harian.

Semak elauan pemain, jurulatih paralimpik

SHAH ALAM - Majlis Sukan Negara (MSN) akan menyemak semula elauan jurulatih dan atlet para badminton dalam Program Podium atas pencapaian mereka dalam temasya antarabangsa tahun ini.

Ketua Jabatan Sumber Manusia dan Pentadbiran Persatuan Badminton Malaysia R Ravendran berkata antara temasya yang diambil kira ialah Sukan Para ASEAN 2023 Kemboja serta Sukan Para Asia 2022 Hangzhou, lapor Berita Harian.

"Antara yang dibincangkan dalam mesyuarat jawatankuasa sukan ialah semak semula elauan tiga jurulatih dan tujuh atlet di bawah Program Podium.

"Namun, perincian ada pada MSN yang akan membincangkan (bersama pihak terbabit) untuk selaraskan semua sebab ada banyak kategori berkaitan dengan pencapaian dan pertandingan yang lepas diambil kira," katanya pada 22 Disember.

Intai peluang layak Olimpik di Qatar

SHAH ALAM - Perenang negara berazam untuk melakukan yang terbaik dalam Kejohanan Akuatik Dunia 2024 pada 2 hingga 18 Februari di Doha, Qatar untuk layak ke Sukan Olimpik 2024.

Berbaki kurang dua bulan menjelang kejohanan berkenaan, Khiew Hoe Yean berikrar menjadikan pertandingan itu batu loncatan buatnya ke Paris dan perlu berenang bawah masa kelayakan Olimpik 3 minit 46.78 saat.

"Saya cuba melayakkan diri ke Sukan Olimpik di Paris sejak awal tahun ini, malangnya saya tidak berjaya. Sudah pasti saya akan mencuba sekali lagi pada Kejohanan Akuatik Dunia nanti," katanya lapor Bernama.

Sekiranya gagal, Hoe Yean yang beraksi dalam acara 400 meter gaya bebas lelaki perlu mencuba pertandingan lain sebelum kelayakan Olimpik berakhir pada 23 Jun.



NAJWAN HALIMI
Kota Anggerik

merasmikan majlis apresiasi pelajar tingkatan lima SMK Seksyen 11, Shah Alam



DATUK JOHAN ABD AZIZ
Dusun Tua

meninjau Jualan Ehsan Rahmah di Taman Alam Jaya, Hulu Langat



ABBAS AZMI
Sri Serdang

menziarahi penduduk di Bandar Putra Permai, Subang Jaya



WONG SIEW KI
Seri Kembangan

mengedar kalender 2024 di Pasar Borneo, Subang Jaya



CHUA WEI KIAT
Rawang

merasmikan program khatan di Masjid Jamek Batu Arang, Hulu Selangor



PREAKAS SAMPUNATHAN
Kota Kemuning

meninjau keadaan jalan rosak di Batu 5, Shah Alam



PUA PEI LING
Bukit Lanjan

mengagih kalender tahun baharu di Prima Damansara, Petaling Jaya



LWI KIAN KEONG
Sungai Pelek

serah sumbangan kepada mangsa bencana di DUN beliau

Van transit mudahkan penduduk

SHAH ALAM - Perkhidmatan van transit atas permintaan (DRT) yang beroperasi di Dewan Undangan Negeri Bukit Antarabangsa sejak awal bulan ini memudahkan pergerakan pengguna.

Menurut wakil rakyatnya, perkhidmatan diterajui Trek Rides melibatkan 106 hen-tian di zon Ampang.

"Kita lihat perkhidmatan ini memang memudahkan pengguna kerana ada sesetengah tempat pengguna sukar untuk mendapatkan pengangkutan



awam khususnya mereka yang berada di kawasan sempit dan berbukit.

"Setakat ini tiada jumlah tepat penumpang menggunakan perkhidmatan ini kerana masih pada peringkat awal, tetapi difahamkan memang ada permintaan," kata Kamri Kamaruddin pada 21 Disember. Beliau menambah promosi projek rintis berkenaan akan dipergiat supaya pengguna mengetahui kewujudan perkhidmatan terbabit sekali gus meningkatkan bilangan pengguna.

"Untuk permulaan DRT dilaksanakan

di kawasan yang kita rasa ada banyak permintaan dahulu. Jika tiada (permintaan), kita akan lihat keperluan untuk ubah.

"Sebab itu kita akan memperhebat publisiti perkhidmatan ini dengan memaklumkan kepada penduduk setiap kali perjumpaan bersama mereka tetapi pihak berkaitan juga perlu buat perkara sama," katanya.

Pengguna yang mahu mendapatkan perkhidmatan DRT boleh memuat turun aplikasi Trek Rides di App Store dan Google Play Store atau layari laman sesawang www.trekrides.com

Teroka potensi ekonomi

Kampung tradisional destinasi pelancong

Oleh **NAS NORZIELA NASBAH**

SHAH ALAM - Keunikan beberapa kampung tradisional di Pandamaran mampu menjadikan kawasan di Dewan Undangan Negeri (DUN) itu sebagai destinasi pelancongan.

Wakil rakyatnya berkata meskipun Pandamaran hanya bandar kecil yang terletak di antara Banting dan Pelabuhan Klang, namun ada beberapa lokasi mempunyai keunikan tersendiri.

"Bukan sekadar Little India Klang, pusat beli-belah seperti GM Klang tetapi terdapat beberapa kampung tradisional boleh dijadikan produk pelancongan seterusnya meningkatkan ekonomi penduduk melalui sektor ini.

"Saya melihat beberapa perkampungan warisan seperti Melayu, India dan Cina masih dikenalkan. Jika kerja naik taraf dijalankan di kawasan tersebut, ia akan menjadi tarikan kepada pelancong asing yang sememangnya mengagumi budaya negara kita," kata Leong Tuck

Chee pada 22 Disember.

Beliau menjelaskan cadangan untuk memperkasa sektor pelancongan di DUN berkenaan akan dipanjangkan menerusi perbincangan dengan Majlis Pelancongan Malaysia (Mita).

"Kita sedang berbincang dengan Mita untuk tarik pelancong asing yang masuk melalui Terminal Pelayaran Pelabuhan Klang. Pelancong mempunyai pilihan untuk singgah ke Pandamaran dan kawasan sekitar Klang tanpa perlu ke Kuala Lumpur untuk melancong.

Galak penduduk daftar bantuan

SHAH ALAM - Ahli Dewan Negeri (ADN) Kampung Tunku terus mempergiat usaha untuk memastikan lebih ramai penduduk berpendapatan rendah (B40) mendaftar program bantuan Kerajaan Negeri.

Menurut Lim Yi Wei, kebanyakan penduduk dalam lingkungan usia 30 hingga 50 tahun dan bekerja kurang peka dengan program Iltizam Selangor Penyayang (ISP) berbanding warga emas atau pesara.

"Warga emas di kawasan ini lebih cekik dengan perkembangan skim ban-

tuan negeri. Apabila nampak hebohan di media sosial atau WhatsApp, mereka segera mohon di pusat khidmat masyarakat (PKM).

"Golongan yang bekerja tiada masa mendaftar atau meneliti bantuan ISP kerana sibuk bekerja. Jadi, itu antara matlamat PKM tahun depan untuk pastikan golongan berkenaan mendaftar," katanya pada 21 Disember.

Mengikut statistik Jabatan Perangkaan Malaysia, sebanyak 58.5 peratus daripada 54,891 warga Kampung Tunku

dikategorikan sebagai usia bekerja dengan 22.3 peratus umur muda, manakala umur tua 19.2 peratus.

Kerajaan Selangor menyediakan peruntukan RM600 juta setahun untuk menjayakan ISP bagi memastikan kebajikan rakyat terbela menerusi lebih 40 pakej bantuan.

Program itu memanfaatkan kanak-kanak, wanita, pelajar, orang kurang upaya, petani dan peniaga kecil dalam pelbagai bidang termasuk kesihatan, pendidikan, perumahan dan keusahawanan.

Sedia 10 doktor untuk khatan perdana

HULU LANGAT - Seramai 110 kanak-kanak sekitar Hulu Langat menyertai Program Grand Sunathon 2023 Parlimen Hulu Langat di Masjid Raja Musa, Semenyih.

Acara bermula meriah dengan peserta berendam terlebih dahulu dalam kolam renang mudah alih sebelum disirami pancuran air jentera bomba.

Pegawai Khas ahli parlimen Hulu Langat Mohd Tazley Nik Nordin berkata lebih RM20,000 diperuntuk bagi

program anjuran bersama pihak masjid dan Pertubuhan Bantuan Perubatan Malaysia (MMAS) itu.

"Untuk program ini ibu bapa hanya perlu membayar RM50 bagi setiap peserta yang mana jika di klinik atau hospital di luar mungkin mencecah sekurang-kurangnya RM150 untuk prosedur berkhatan."

"Disebabkan tahun ini dapat sambutan menggalakkan dan ahli parlimen Hulu Langat (Mohd Sany Hamzan) juga gembira dengan hasilnya, kita cadang

tahun depan untuk teruskan lagi mungkin dalam skala lebih besar," katanya pada 24 Disember.

Sementara itu, Pengurus MMAS Hanafi Jallaludin berkata seramai 10 doktor disediakan bagi menjalankan prosedur berkhatan peserta berusia antara lima hingga 12 tahun itu.

"Alhamdulillah, kita komited untuk meneruskan program sebegini yang secara tidak langsung mengurangkan beban ibu bapa," katanya.

Naik taraf dewan 8,000 penduduk

SHAH ALAM - Kerja naik taraf dewan serbaguna di Kampung Sungai Terentang, Rawang membabitkan kos lebih RM150,000 siap sepenuhnya baru-baru ini.

Wakil rakyatnya Chua Wei Kiat berkata kemudahan yang dilengkapi gelanggang bola keranjang itu mampu memanfaatkan sekitar 8,000 penduduk.

"Syukur, kerja menaik taraf dewan dan gelanggang bola keranjang siap sepenuhnya dan terima kasih Kerajaan Negeri kerana meluluskan peruntukan sebanyak RM152,000.

"Antara yang dibaik pulih termasuklah menukar lantai pejabat, mengecat dan menambah bumbung di kawasan dewan," katanya menerusi Facebook pada 21 Disember.

Kerjasama realisasi pembangunan

KLANG - Majlis Perbandaran Klang (MPK) melaksanakan pelbagai program sepanjang tahun ini bagi mencapai matlamat pembangunan mampan (SDG).

Yang Dipertua Datin Paduka Noraini Roslan berkata ia meliputi program komuniti strata, hari tanpa kenderaan, kebun komuniti, kejiranran, penanaman pokok, kitar semula dan penjagaan sungai.

Menurutnya, program lain yang rancak berjalan seperti projek berdaya huni, My-Place, lorong basikal, pejalan kaki, bandar pintar, bandar selamat dan rejuvenasi bandar.

"Pelaksanaan SDG 17 (Meningkatkan Kesepadan Dasar Untuk Pembangunan Mampan) memberi dampak positif apabila MPK meraih pelbagai pencapaian hasil kesepadan semua pihak," katanya pada 20 Disember.

Antara kejayaan MPK dipilih lima finalis PBT kategori perbandaran terbaik, Anugerah Penghargaan Bandar Mampan (Murninets), Anugerah 'Smart City Early Adopter' dan Anugerah 'Competition of SDG Roadmap'.

Pistol air kurangkan gemuruh peserta

HULU LANGAT - Ibu bapa kanak-kanak yang menyertai program Grand Sunathon Parlimen Hulu Langat 2023 mengambil pelbagai inisiatif bagi mengurangkan gemuruh anak masing-masing untuk berkhatan.

Amir Adib, 33, membeli pistol air mainan untuk anaknya, Farish Adam Adrian, 6, bermain ketika berendam dalam kolam renang mudah alih disediakan penganjur untuk peserta.

"Dua tiga hari anak cakap dia takut, jadi saya gunakan cara ini untuk kurangkan gemuruh dan alih perhatiannya. Bila dia bermain pistol air bersama dua sepupu yang turut sama bersurat, dia nampak lebih tenang."

"Terima kasih kepada pihak yang terlibat menganjurkan program ini kerana ia membantu mengurangkan beban ibu bapa terlibat," katanya pada 24 Disember.

Kursus TVET untuk lepasan tahfiz

4

Pantau perkembangan semasa Covid-19

3

2,800 kanak-kanak terima pek nutrisi

5

MPS kutip RM100.35 juta cukai taksiran

19

selangorkini

Program selawat ambang tahun baru

SHAH ALAM - Kemuncak sambutan ambang tahun baru 2024 bakal dimeriahkan dengan program Darul Ehsan Berselawat di Dataran Karnival, pekarangan Stadium Shah Alam pada 31 Disember.

Pengarah Program Daing Muhammad Reduan berkata sambutan berkonsep keagamaan turut diserikan dengan program Doa Untuk Palestin yang turut menampilkan beberapa artis ternama sehari sebelumnya.

"Untuk sambutan tahun ini kita tampilkan beberapa tokoh antaranya Habib Jindan Novel, Habib Ali Zainal Abidin Assegaf dan Habib Nael Ben Taher. Program bermula 7 malam.

"Kita juga bekerjasama dengan Ribath Fatimah Az-Zahra dan Majlis Perundingan Pertubuhan Islam Malaysia (Mapim) untuk program Doa Untuk Palestin. Selain itu, ada juga pameran mengenai Palestin dan persembahan artis," katanya.

Pengunjung turut diingatkan untuk membawa sejada dan tikar serta memakai pelitup muka.

Kutip RM3.3 juta bayaran lesen niaga

SHAH ALAM - Majlis Perbandaran Ampang Jaya (MPAJ) mengutip bayaran lesen perniagaan berjumlah RM3,393,885.80 setakat 19 Disember.

Yang Dipertua Dr Aini Ahmad berkata ia membabitkan 4,910 premis membuat pembaharuan lesen melalui sistem iCOMM manakala 223 premis secara manual.

"Bagi pembaharuan lesen usahawan Mikro 2024 pula sebanyak 4,087 penjaja memperbaharui lesen melalui sistem E-penjaja dengan kutipan hasil sebanyak RM 500,750.81.

"Pemegang lesen akan dikenakan caj denda lewat RM360 secara automatik sekiranya memperbaharui lesen selepas 31 Disember ini," katanya baru-baru ini.

Dr Aini turut menegaskan pemegang lesen diingatkan untuk membuat pembayaran dan menjelaskan tunggakan cukai taksiran selaras dengan pelaksanaan Sistem Kelulusan Bersepadu.

Tanam pelbagai pokok buah di sekolah

SHAH ALAM - Sebanyak 150 pokok buah-buahan pelbagai spesies ditanam menerusi program Dusun @mysekolah di Sekolah Menengah Kebangsaan Setia Alam di sini pada 6 Disember.

Pemangku Datuk Bandar Shah Alam Chermi Tarman berkata program tahunan Majlis Bandaraya Shah Alam (MBSA) itu dianjurkan kali kesembilan sejak 2013.

"Ia merupakan salah satu usaha pihak MBSA untuk memupuk masyarakat di Shah Alam mencintai alam sekitar dan kehijauan bermula daripada peringkat sekolah lagi. Ia juga seiring matlamat untuk menjadikan Shah Alam sebagai bandar raya rendah karbon menjelang 2030," katanya.



Liga Malaysia 2024 mulai 3 Mei

21

Borhan menyampaikan hadiah kepada pemenang kostum tangkap layar terbaik lelaki dalam Konsert Rentak Selangor: Nostalgia Lagu-Lagu 70-an di Petaling Jaya pada 23 Disember.

Foto FIKRI YUSOF

Martabat warisan seni muzik

Rentak Selangor gilap bakat belia

Oleh FITRI HAZIM HAZAM

PETALING JAYA - Penggiat seni muda menyambut baik usaha Kerajaan Negeri memartabatkan warisan seni dan budaya melalui program Rentak Selangor.

Di samping menyerlahkan bakat, program berkenaan juga membuka peluang buat anak muda mempelajari muzik yang menjadi warisan supaya tidak hilang ditelan zaman.

Penyanyi muda Daniela Azrid, 13, berkata Konsert Rentak Selangor Nostalgia 1970-an memberi ruang buat-

nya meneroka pelbagai jenis muzik yang mencabar vokalnya.

"Saya mula menyanyi sejak berusia tiga tahun. Konsert ini kali kedua (saya) menyanyi dengan genre muzik 1970-an, sebuah pengalaman baharu untuk saya."

"Saya hargai peluang diberikan pengajar untuk membuat persembahan. Program ini juga bagus untuk generasi saya mengenali kehebatan seni muzik era 70-an," katanya.

Beliau mendendangkan lagu berjudul Kemesraan nyanyian Halil Chik melalui Segmen Bakat Baru di Dewan Sivik Majlis Bandaraya Petaling Jaya

pada 23 Disember.

Seorang lagi bakat muda, Nurul Hidayah R R Jali, 17, melihat konsert tersebut peluang terbaik untuknya mengetengahkan bakat nyanyian dalam genre muzik 70-an.

"Usaha Kerajaan Negeri ini juga perlu dipuji kerana inisiatif baik untuk memastikan identiti genre muzik 70-an tidak tenggelam pada zaman moden ini," katanya.

Sementara itu, penyanyi era 1970-an Datin Effa Rizan berpendangan konsert Rentak Selangor memberi penghormatan terhadap dedikasi dan kreativiti artis dahulu.

Penghargaan buat Datuk Lat

SHAH ALAM - Seniman Diraja Datuk Lat menerima Anugerah Cai Zhizhong Comic Prize yang dianjur kali ketiga di Guangzhou, China pada 22 Disember.

Lat atau nama sebenarnya Mohd Nor Khalid, 72, bangga dengan pengiktirafan oleh jawatankuasa anugerah itu melibatkan beberapa pengkarya terkenal daripada pelbagai

cabang kesenian di China.

"Saya bangga kerana kita mewakili negara kita, lagi pula hubungan antara China dan Malaysia sekarang sangat baik, kebanyakannya melibatkan perniagaan," katanya seperti dilapor Bernama pada 25 Disember.

Beliau berkata buku komik dan kartun yang dihasilkannya sebelum ini telah ditatap luas di merata tempat

di luar negara, termasuk China sejak tahun 70-an lagi.

Mengesahkan dirinya juga merupakan peserta tunggal dari luar China dalam majlis anugerah kali ini, Lat turut dipelawa untuk terlibat dalam pemilihan karyawan pada masa hadapan, namun memaklumkan kepada jawatankuasa anugerah bahawa beliau tidak aktif ketika ini.